



六朝事迹編類序

建康禹貢揚州之域斗牛分野在周為吳在春秋為

為越曾哀公二十二年自越之後一百四十年為楚

周顯王三十楚滅越自楚之後一百一十年為秦楚負秦三

滅乃周赧初楚威王因山立號置金陵邑或云以此

埋金以鎮之或云地接金壇之及秦兼諸侯分天下

為三十六郡以金陵屬鄣郡故鄣為今吳時望氣者

云五百年後有天子氣始皇東巡鑿鍾阜斷長隴以

通流改其地為秣陵縣秦秣陵縣在今府城東南六

漢武帝元封初廢鄣郡置丹陽郡而秣陵縣不改漢

初置揚州治無定所輿地志云先理歷陽後理壽春其後又徙曲阿漢建安十六年孫權自京口徙治秣陵明年石頭城改秣陵爲建業晉太康初廢建業復爲秣陵愍帝諱業卽改爲建康元帝卽位以建康太守爲丹陽尹宋齊而下咸都於此焉隋平陳廢丹陽郡乃於石頭城置揚州併秣陵建康同夏三縣入江寧縣唐武德二年爲揚州東南道行臺置尙書省輔公祏據江東七年平又改爲蔣州八年罷行臺稱揚州大都督府領上元金陵句容丹陽溧水等縣九年移揚州治江都改金陵爲白下縣屬潤州正觀七年

復爲揚州乾元元年改爲昇州上元二年廢光啓三年復仍以上元句容溧水溧陽四縣隸之置節度使天祐四年楊行密據其地爲金陵府號曰齊國封李昇爲齊王以建康爲西都以廣陵爲東都昇僭位國號唐皇朝開寶八年復爲昇州天禧二年改江寧府建炎三年改建康府此金陵郡之升降廢置之不常也余因覽圖經實錄疑所在六朝事迹尚有脫誤乃取吳志晉書及宋齊而下史傳與夫當時之碑記叅訂而攷之分門編類綴爲篇目凡十有四卷雖猥陋無益於治道然展卷三百餘年興衰之迹若身履乎

其問非徒得之于傳聞而已同志之士盍補其所未備者而傳之紹興歲次庚辰八月左奉議郎充江南東路安撫司幹辦公事新安張敦頤序

六朝事迹編類目錄

總叙門第一

六朝興廢

六朝宮殿

六朝郡國

形勢門第二

鍾阜

建康之東近北

朱雀航

建康之南

城闕門第三

越城

六朝建都

六朝郊社

六朝保守

石城

建康之西

真武湖

建康之北

吳固城

國家圖書館 NATIONAL CENTRAL LIBRARY, TAIWAN, R.O.C.

金城

冶城

琅琊縣城

建康縣城

同夏縣城

白下縣城

臨沂縣城

蔣州城

臺城

檀城

石闕

朱雀門

白下門

丹陽門

樓臺門第四

亭館附

落星樓

烽火樓

景陽樓

入漢樓

梁昭明書臺

衛玠臺

周處臺

亦名子隱堂

九日臺

雨花臺

新亭

五馬亭

賞心亭

白下亭

東冶亭

翠微亭

三山亭

儒學館

湯泉館

儀賢堂

袂襖堂

聽箏堂

蠶室

三閣

馳道

齊雲觀

層成觀

桂林苑

樂遊苑

上林苑

芳林苑

芳樂苑

江河門第五

溝渠
溪井附

大江

秦淮

直瀆

橫塘

青溪

潮溝

霹靂溝

北渠

蟹浦

覆杯池

落义池

三巖石

邀笛步

迎檐湖

太子湖

蘇峻湖

半陽湖

絳巖湖

固城湖

丹陽湖

溧陽源

五馬渡

桃葉渡

麾扇渡

白鷺洲

長命洲

葛仙丹井

景陽井

亦名
脂井

應潮井

藏米井

山岡門第六

石碗山

天闕山

鳳臺山

覆舟山

幕府山

雞籠山

方山

攝山

東山

白山

濁山

湯山

大壯觀山

臨沂山

祈澤山

東廬山

盧龍山

馬鞍山

大巫山

小巫山

平陵山

鐵冶山

絳巖山

竹里山

大城山

望祭山

白土岡

白楊路

千佛嶺

謝安墩

桃花塢

方山埭

雞鳴埭

鑄劍坑

射雉場

絕地

宅舍門第七

孔子巷

言偃里

四學

陸機宅

孫瑒宅

劉子珪宅

朱异宅

諸葛恪宅

宋齊丘宅

杜姥宅

烏衣巷

乘黃署

紙官署

扶南樂署

銅螭署

錦署

焚衣街

識記門第八

秦淮石誌

石印

石室

三斷石

寶公銅牌記

潛鶴鼓

天水碧

獨足臺

靈異門第九

八功德水

誌公鱸殘魚

牝狙觸網

感龍產鯉

郝氏化蛇

燕雀湖

新洲

生人筏

木醴

神仙門第十

茅君山

仙人臺

尋仙觀

太虛觀

華陽洞

華陽宮

鸞洞宮

太平觀

青元觀

洞元觀

仙杏山

白都山

石城洞

道士塢

靜壇

春礪

玉晨觀

寺院門第十一

吳建初寺

同泰寺

蔣山太平興國禪寺

半山報寧禪寺

清涼廣惠禪寺

昇元寺 亦名瓦棺寺

大愛敬寺

法寶寺 亦名臺城寺

法光寺 今名鹿苑寺

棲霞禪寺

祈澤寺

鐵索寺

明慶寺

佛窟寺

普濟寺 舊名頭陀寺

淨妙寺 舊名齊安寺

寶林寺

寶乘院 亦名草堂寺

聖湯延禪寺

景德寺

長干寺

今名天禧寺

能仁寺

廟宇門第十二

吳大帝廟

蔣帝廟

晉元帝廟

武烈帝廟

楚平王廟

晉謝將軍廟

晉卞忠正廟

晉陰山廟

梁祈澤夫人廟

青溪夫人廟

潘真君廟

茅君白鶴廟

荊將軍廟

茅司徒廟

菩提王廟

二判官廟

楚靳尚廟

五龍堂

興德王廟

炳靈公廟

張僕射廟

墳陵門第十三

吳大帝陵

吳步夫人陵

吳宣明太子墳

吳甘寧墓

吳葛仙公墓

晉元帝陵

晉明帝陵

晉成帝陵

晉康帝陵

晉穆帝陵

晉哀帝陵

晉簡文帝陵

晉孝武帝陵

晉安帝陵

晉恭帝陵

晉山簡墓

晉溫嶠墓

晉郭璞墓

晉竺使君墓

宋武帝陵

宋文帝陵

宋文帝袁后陵

宋明宣沈太后陵

宋明帝陵

大司徒甄邯墓

宋謝濤墓

宋謝濤夫人王氏墓

冥漠君墓

齊劉皇后墓

齊獻武公墓

梁吳平忠侯墓

梁始興王墓

梁安成王墓

梁臨川王墓

梁建安侯墓

陳高祖陵

陳文帝陵

左伯桃墓

雙女墓

南唐張懿公墓

南塘李順公墓

南唐高越墓

碑刻門第十四

吳大帝封禪碑

吳後主紀功三斷石牌

晉西平侯顏含二碑

晉竺使君銘

晉竺使君頌

宋謝濤夫人王氏墓記

齊獻武公碑

梁忠武王碑

梁安成王碑

梁昭王墓誌銘

梁敬太妃墓誌銘

梁靖惠王碑

梁吳平忠侯碑

梁建安侯碑

梁許真人壇碑

陳江揔棲霞寺碑

陳宮井欄題刻

隋平陳碑

唐明徵君碑

唐棲霞寺齊會記

唐律大師碑

唐開善寺記

唐玉清觀四等碑

唐沈傅師齋疏

唐王法主碑

唐紫陽觀碑

唐玄靖先生碑

唐孫尊師詩碑

唐韋君碑

唐下泊宮記

唐許真人井銘

唐白鶴記

唐義女碑

僞吳銅鑄文

僞吳釘石鑄文

南唐寶華宮碑

南唐請鍾記

南唐寶華宮什物記

南唐李順公碑

南唐張懿公碑

南唐蔣廟碑

南唐易氏墓誌

南唐李後主祭文

南唐開善寺井記

南唐義井欄刻

南唐棲霞寺詩

棲霞寺殿記

重建蔣廟碑

惠烈廟記

蔣廟篆祭文

道光泉記

八功德水記

蔣山寺莊田記

蕭帝寺記

子隱堂記

白雲菴記

寶禪師語錄

宋齊丘鳳臺山詩刻

潘君校官碑

漢碑附此

六朝

分類目錄終

六朝事迹編類卷上

新安張敦頤 編

明新安吳 瑄 校

總叙門第一

六朝興廢

吳

大帝

卽位在魏太和七年壬寅歲

權字仲謀姓孫氏吳郡富春人堅之次子兄爲吳侯
將死以事授之破曹操於赤壁襲關羽於荊州黃武
元年四月卽位在位三十一年年七十一葬蔣陵

年號

黃武 七

黃龍 三

嘉禾 六

赤烏 十三

大元 二

會稽王

卽位在魏嘉平四年壬申歲

權少子諱亮字子明母潘氏權薨卽位至太平三年
謀誅大將軍孫綝不克綝黜亮爲會稽王永安三年
孫休鴆殺之在位七年

年號

神鳳 二

五鳳 二

太平 三

景帝

卽位在魏甘露四年戊寅歲

權第六子諱休字子列母王氏亮廢綝迎休卽帝位
綝典禁兵欲謀休因臘受賀縛而殺之永安七年七
月休薨在位七年

年號

永安 七

歸命侯

卽位在魏咸熙二年甲申歲

權廢太子和之子諱皓字元宗母何氏休薨丞相楊
興大將軍張布說太后朱氏迎皓卽帝位皓旣得志
驕淫麤暴誅興布殺景后天紀四年晉遣王濬舟師
至建鄴之石頭皓降之舉家西遷晉太康元年詔賜

歸命侯越五年死在位十七年年四十三

年號

元興一 甘露一 寶鼎三 建衡三

鳳凰二 天冊一 天璽一 天紀五

右吳四主共六十二年

吳初都鄂後遷建業傳世四東據江南盡海置交

理龍編今安南府廣理番禺今廣州荆理南郡今江陵郢理江夏今鄂州四州有

州四十二以建平歸州西陵陝州陸鎮守樂郡江陵松滋縣東

南郡江陵巴丘岳州魯肅孫皓鎮守夏口鄂州武昌鄂州皖城舒州

濡須塢和州牛渚圻宣州為重鎮後得沔口邾城黃州廣

陵自孫權破曹操於赤壁之後時劉璋牧益州周

瑜請於權曰乞與奮威俱進取蜀而并張魯還與

將軍據襄陽以賊操北方可圖也

東晉 繼西晉

元帝

諱睿字景文姓司馬氏西晉宣帝懿之曾孫琅琊恭

王覲之子母恭王妃夏后氏妃通小吏牛氏生元帝

故元石圖有牛在馬後初嗣父位永嘉初用王導計

鎮建鄴西都不守承制改元稱王愍帝崩問至遂即

位 元年丁丑金德都建康帝性簡儉初拜貴人有司請市

崔釵帝以煩廢不許所幸鄭夫人衣無文綵永昌元年崩在位六年年四十七葬建平陵廟號中宗

年號

建武一 大興四 永昌一

明帝

元帝長子諱紹字道畿母荀氏元帝貴人永昌元年

閏十一月即帝位元年癸未大寧二年王敦舉兵內向帝

乘巴滇多年切駿馬微行觀敦營壘敦夢日環其城驚

曰此必鮮卑奴來帝狀類外氏鬚黃故云秋七月敦

水陸五萬至于南岸帝擊破之敦憤惋而死三年閏

八月帝崩在位三年年二十七葬武平陵

年號

大寧三

成帝

明帝長子諱衍字世根母庾氏明帝崩帝即位年五

歲中書令庾亮輔政元年丙戌咸和三年蘇峻作亂遷帝

于石頭陶侃攻殺峻賊黨立峻弟逸為帥滕含敗逸

奉御于温嶠舟已而造新宮遷之咸康八年六月崩

在位十七年年二十二葬興平陵

年號

咸和九 咸康八

康帝

成帝母弟諱岳字世同咸康八年六月卽位元年建

元三年九月崩在位三年年二十三葬崇平陵

年號

建元三

穆帝

康帝子諱聃字彭祖母褚氏康帝崩帝卽位年二歲

褚后臨朝元年升平五年崩在位十七年年十九葬

永平陵

年號

永和十二 升平五

哀帝

成帝長子諱丕字千齡所生母周氏穆帝崩帝卽位

元年雅好黃老辟穀餌藥遂中毒不識萬機興寧二

年崩在位四年年二十五葬安平陵

年號

隆和 興寧三

廢帝

哀帝母弟諱奕字延齡哀帝崩無嗣皇太后迎帝卽

位元年丙寅桓温欲立威權憚帝守道誣以牀第廢為東海王又為海西公安于屈辱太元十一年崩在位六年年四十五葬安平陵

年號

太和六

簡文帝

元帝少子諱昱字道萬所生母鄭氏廢帝廢皇太后詔統皇極咸安元年十一月卽位元年辛未二年崩年五十三葬高平陵

年號

咸安二

孝武帝

簡文帝第三子諱曜字昌明所生母李氏咸安二年卽位元年癸酉帝溺於酒色長星見心甚惡之於華林舉酒曰長星勸你一杯酒自古何嘗有萬歲天子邪初簡文帝見讖云晉祚盡昌明及李太后有身夢神人謂曰汝生男宜字昌明及產東方始明因以為名簡文後悟乃流涕時帝戲所寵張貴人以年幾三十當廢貴人潛怒向席帝醉遂暴崩在位二十四年年三十五

年號

寧康

太元

安帝

孝武帝長子諱德宗字

所生母陳氏武帝淑媛

太元二十一年卽位

元年丁酉

元興三年靈寶逼帝西上

後復逼東下督護馮遷斬靈寶帝反正于江陵義熙

十四年十二月崩在位二十二年三十七葬休平

陵初讖云昌明之後有二帝劉裕將為禪代密使王

韶之縊帝而立恭帝以應二帝云

年號

隆安

五

元興

三

義熙

十四

恭帝

安帝母弟諱德文安帝崩劉裕矯詔立帝

元年己未元熙

元年六月禪位於裕裕以帝為零陵王居秣陵二年

裕使人踰垣殺帝在位二年年三十六謚恭帝葬冲

平陵

年號

元熙

右江左十一帝都建康共一百六年

劉聰既殺愍帝元帝卽位遷都建康號曰東晉傳

世凡十有一爰自永嘉南渡境宇殊狹禹貢九州之地僅有其二元帝初命祖逖鎮雍丘今東京逖死

北境漸蹙于是荆豫自淮以北蔡潁青兗四州登萊密海

淄齊及徐州之半徐沂等州陷劉曜石勒以合肥今廬州

淮陰今楚州壽陽石季龍死後復之今壽州泗口今在泗州角城在泗州為

重鎮成帝時鄮守將退屯襄陽今谷縣穆帝時平蜀

漢擒李勢復梁益之地又遣軍西伐入關至灞上討苻

再北伐一至洛陽討慕容雋破其一將姚襄于伊水一至枋頭衛州

所得郡縣軍旅又洎苻堅東平慕容暉西南

陷蜀漢西克姑臧涼州則漢水長淮以北悉為堅有

及堅敗再復梁益青徐兗荆河內之地其後青兗

陷于慕容德荆河司陷于姚興以彭城為北境藩

扞後梁益又陷于譙縱義熙初陷每因劉石苻姚衰亂

之際則進兵屯戍在于漢中襄陽彭城然大抵上

明今江陵松滋縣江陵夏口武昌合肥壽陽淮陰常為晉

氏鎮守義熙以後又復青兗司荆河梁益之地而

政移于劉氏之宋矣

南朝 繼東晉

宋武帝

高祖武帝劉裕字德輿小字寄奴彭城人楚元王交

二十二世孫父翹郡功曹母穆氏元熙二年十二月
晉恭帝禪位帝表讓至永初元年夏六月丁卯即位
改元元年庚申都建康傳世凡八帝以儉德先天下碎虎
魄枕施直脚牀却入筒布用葛燈籠三年五月巳亥
崩于西殿在位三年年六十七葬蔣山初寧陵廟號
高祖

年號

永初二

少帝

武帝長子諱義符小字車兵母張夫人永初三年夏

五月癸亥以皇太子即帝位元年癸亥景平二年夏五月
巳酉皇太后令暴其過惡廢爲營陽王六月癸丑徐
羨之等弑帝于金昌亭在位二年年十九

年號

景平二

文帝

武帝第三子諱義隆小字車兒母胡婕妤少帝廢徐
羨之等迎立元嘉元年秋八月丁酉即帝位元年甲子三
十年二月甲子爲元凶太子劭所弑在位三十年年
四十七葬長寧陵廟號太祖

年號

元嘉 三十

孝武

文帝第三子諱駿字休龍母路淑媛殺元凶劭自立

元年甲子元嘉三十年四月辛酉即皇帝位于新亭帝少

機穎讀書七行俱下才藻甚美大明八年夏五月庚

申崩在位十一年年三十五葬秣陵巖山景寧陵廟

號世祖

年號

孝建 三 大明 八

前廢帝

孝武帝長子諱子業字法師大明八年閏五月庚午

以皇太子即帝位元年甲辰帝自以昔在東宮時不為孝

武所禮及即位將掘景寧陵太史言於帝不利乃縱

糞于陵肆罵孝武為臚壯加切奴又發殷貴妃墓十一

月帝左右壽寂之等謀廢帝懷刀入宮弑之乃崩于

華光殿在位一年年十七葬丹陽秣陵

年號

景和 一〇正月乙未改永光

明帝

文帝第十一子諱或字休景母沈婕妤泰始元年冬十二月丙寅即帝位元年乙巳泰豫元年夏四月巳亥崩于景福殿在位八年年三十四泰豫元年五月戊寅葬臨沂縣幕府山高寧陵廟號太宗

年號

泰始七

泰豫一

後廢帝

明帝長子名昱字德融母陳氏李道兒妾人呼李氏子明帝崩以皇太子即帝位元年癸丑孝武二十八子明帝殺其十六餘皆帝殺之元徽五年七月七夕楊玉

夫等入氈幄內弑帝于仁壽殿年十五葬秣陵

年號

元徽五

順帝

明帝第三子諱準字仲謨蕭道成奉太后令迎立昇明元年七月壬辰即帝位元年丁巳改元徽五年為昇明元年三年四月壬辰禪位于齊齊封為汝陰王建元元年五月巳未殺之葬于遂寧陵

年號

昇明三

右劉宋八帝共六十年

宋武帝北平廣固

慕容起廣固今青州

西定梁益

譙縱

又克長

安

姚弘

盡得河南之地長安尋為赫連勃勃所陷至

廢帝景和中武牢西復陷後魏今大較以孝武大

明為正凡二十有二州楊理建業

今建康

南徐理京

口

今閩州丹徒縣

徐理彭城

今徐州

南兗理廣陵

今揚州

兗理

瑕

今兗州縣

南豫理歷陽

今和州

豫理汝南

今蔡州汝陽縣

江理

潯陽

今江州

青理臨淄

初理歷城復理廣固後又移理臨淄今青州縣

冀理

歷城

今濟州縣

司理義陽

今信陽

荆理南郡

今江陵府

郢理江

夏

今鄂州

湘理臨湘

今潭州

雍理襄陽

今襄州

梁理南鄭

今興元府縣

秦亦理南鄭益理成都

今成都府

寧理建寧

今姚州

廣理南海

今廣州

交理龍編

今安南府

越理臨漳

今廉州

凡二百三十八縣千一百七十九初文帝元嘉中遣

將北伐水軍入河克魏碣磔滑臺

今滑州

武牢

今河南

洛陽

今西京

西城其後又失又分軍北伐西軍克洪

農開方二城以東攻滑臺不克而平碣磔守之尋

皆敗退於是後魏太武總師經彭城臨江屯於瓜

步

揚州

退攻盱眙

今楚州

不拔而還明帝時後魏又南

侵淮北冀徐兗四州又荆河州西境悉陷沒則長

淮為北境僑徐兗於淮南

淮陰立兗州淮陰今楚州鍾離立徐州鍾離今

立青冀二州寄理贛榆今海州東海縣其後十餘年而

滅亡然初強盛也南鄭襄陽垂瓠今在蔡州形若瓠垂故名彭

城歷城東陽今青州益陽縣皆為宋氏藩扞

南齊繼宋

高帝

蕭氏諱道成字紹伯蘭陵人漢蕭何二十一世孫建

元元年夏四月甲午受宋禪即帝位於南郊元年都

建康傳世凡七帝性簡儉後宮器物欄檻以銅為飾

皆改用鐵內殿施黃紗帳宮人著紫皮履華蓋除金

華瓜用鐵回釘每日使我臨天下十年當使黃金與

土同價四年三月壬戌崩于臨光殿在位四年年五十六葬于武進泰安陵廟號太祖

年號

建元四

武帝

高帝長子諱願字宣遠建元四年三月壬戌以皇太

子即帝位元年明年正月辛亥改元永明帝性剛毅

有斷政揔大體以富國為先頗喜遊宴雕綺之事言

常恨之未能頓遣永明十一年七月戊寅崩于延昌

殿在位十一年年五十四葬景安陵廟號世祖

年號

永明 十一

廢帝鬱林王

武帝孫文惠太子長子諱昭業字元尚小字法身永明十一年戊寅武帝崩以皇太孫即帝位元年帝淫亂賞賜左右動至百數十萬每見錢曰我昔思汝一箇不得今日得用汝矣西昌侯鸞屢諫不聽帝欲誅鸞屢諫不聽帝欲誅鸞鸞使蕭湛等領兵入宮弑之在位一年年二十二

年號

隆昌 一

廢帝海陵王

文惠太子第二子諱昭文字季尚鬱林王廢延興元年秋七月丁酉即皇帝位時宣城王鸞輔政帝起居皆諮而後行十月辛亥皇太后使宣城王入纂帝統令廢帝為海陵王建武元年冬十月鸞遣師殞之

年號

延興 一

明皇帝

始安貞王子諱鸞字景棲海陵王廢太后以帝纂統

建武元年十月辛亥卽帝位元年乙亥永泰元年七月巳酉帝崩于正福殿在位五年年四十七

年號

建武四 永泰一

廢帝東昏侯

明帝第二子諱寶卷字智藏永泰元年七月巳酉以皇太子卽帝位元年巳卯帝惑于潘妃為神仙等殿極奢麗又鑿金為蓮花以帖地令潘妃行其上曰此步步生蓮花也永元三年秋七月蕭衍至南豫州帝閉宮門自守十二月王珍國張稷率兵入殿殺帝斬首送

蕭衍在位三年年十九

年號

永元三

和帝

明帝第八子諱寶融字智昭中興元年三月乙巳卽皇帝位元年辛巳三年遜位于梁梁奉帝為巴陵王宮于姑熟四月戊辰殂追尊為和帝在位二年年十五葬恭安陵

年號

中興二

右齊七帝共二十四年

南齊淮北之地所有絕少青州理朐山今海州縣冀理

渦口今泗州臨淮縣荆河理壽春今壽州北兗理淮陰今楚州

北徐理鍾離今濠州又置巴東理巴州今夔州其餘州

郡悉因前代州凡二十有二郡三百九十五縣千

四百七十四其後頻為後魏所侵至東昏永元初

河北諸郡相繼敗沒今鄧州地又遣軍北伐敗于圈馬

屯盆城今鄧州界又失壽春後三年齊亡始全盛也南

鄭今興元府樊城今襄州臨漢縣襄陽今襄州義陽今信陽壽春今壽州

淮陰今楚州角城今泗州臨淮縣東南漣口今泗州漣水縣北朐山

今海州縣悉為重鎮

梁繼齊

武皇帝

蕭氏諱衍字叔達蘭陵人父為丹陽尹母韓氏中興

二年三月丙午齊禪位于梁天監元年夏四月丙寅

帝以梁王即帝位元年壬申都建康傳世凡四帝生而有

異光狀貌殊特有文在手曰武帝初為兒時能蹈空

而行及長博學有文武才幹性溺于釋教郊廟牲牲

皆代以麵宗廟薦羞始用菽粟幸同泰寺鑄十萬斤

銅像幸阿育王寺設無礙法喜會設四部無遮會講

國家圖書館, NATIONAL CENTRAL LIBRARY

金字三慧經三度捨身羣臣以錢億萬贖帝請臨宸極三請乃許太清三年五月丙辰侯景舉兵攻陷宮城帝憂懼寢疾崩于淨居殿在位四十八年年八十六葬于修陵廟號高祖

年號

天監

十八

普通

七

大通

二

中大通

六

大同

十一

中大同

一

太清

三

簡文帝

武帝第三子諱綱字世讚母穆貴妃太清三年五月辛巳以皇太子即帝位元年庚申大寶元年十月乙未侯

景逼帝幸西川使彭雋等進觴與帝極飲帝醉寢雋以土囊壓之帝崩在位一年年四十九葬莊陵廟號太宗

年號

大寶

二

元帝

武帝第七子諱繹字世誠母阮采女承聖元年三月王僧辯等平侯景傳首江陵十一月丙午即帝位江陵元年壬申先是魏使宇文弼來聘帝接遇有闕魏相安定公憾之三年十一月魏軍至柵下大攻帝出批

把門親臨督戰兵敗見執十二月魏軍殺之帝在位
三年年四十七明年四月梁王方智承制追尊為元
帝廟號世祖葬頴寧陵

年號

承聖

敬帝

元帝第九子諱方智字惠相母夏貴妃承聖三年七
月辛丑王僧辯納貞陽侯蕭明自采石渡江入建鄴
丙午即偽位司空陳霸先殺王僧辯黜蕭明而奉帝
紹泰元年九月丙午即帝位元年乙亥太平二年十月遜

位于陳陳奉帝為江陰王薨在位三年年十六追謚
敬皇帝

年號

紹泰

太平

右梁四主共五十六年

梁氏州郡多沿舊制天監中有州二十有郡三百
五十縣千二十有五其後更有析置大同中州十
有七郡縣亦稱此初武帝受禪數家即失漢州及
淮西之地梁州刺史夏侯道陵後魏魏將元英其後諸將頻
年與魏軍交戰于淮南淮北互有勝負雖得瓠城

俄而又失又克壽春宋大通初大舉北伐淮北城鎮相次克平直至洛陽暫為梁有其後諸將又復

漢中自天監二年失漢州至侯景東魏將以河南地

降逆亂相尋有名無實及景平後江北之地悉陷

高齊漢川蜀沒于西魏太清初侯景以十三州來

所敗二年景又圍建康陷之承聖初齊將慕容紹宗

伐盡得淮南江北之地得傳國璽反于齊三年西

魏將達奚武陷漢川尉遲迥大抵雍州今襄

陷蜀川其漢川經九年而復白苟堆今蔡州下澧

城今潁合肥鍾離淮陰朐山為鎮

陳繼梁

武皇帝

陳氏諱霸先字興國吳興人都建康傳世凡五帝所

出甚微初仕鄉為里司又為油庫吏後仕梁為陳王

太平二年十月辛未梁敬帝禪位永定元年冬十月

乙亥即帝位于南郊柴燎告天元年帝雄武多英畧

性甚仁愛初平侯景及立敬帝子女玉帛皆班將士

三年六月丙午崩于璿璣殿在位三年年五十七葬

萬安陵廟號高祖

年號

永定

文皇帝

武帝兄始興昭烈王之長子諱禧字子華永定三年六月丙午即皇帝位元年庚辰帝少沈敏有識量美容儀留意經史武帝甚愛之常稱吾家英秀初起自布衣知百姓疾苦每雞人伺漏傳籤於殿中者令投籤于堦石上鎗然有聲云吾雖得眠亦令驚覺天康元年夏四月癸酉崩于有覺殿在位七年年若干葬永寧陵廟號世祖

年號

天嘉

六

天康

一

廢帝

文帝長子諱伯宗字奉業母沈氏天康元年夏四月癸酉以皇太子即帝位元年丁亥帝性仁弱刑政皆歸冢宰故光大二年冬十一月甲寅宣太后令廢為臨海王太建二年四月乙卯薨在位二年年十九

年號

光大

二

宣帝

始興昭烈王第二子諱頊字紹世小字師利太后既黜廢帝以帝入纘皇統元年巳丑太建元年春正月甲午

卽帝位十二年九月癸未夜天東南有聲如風水相激十四年正月甲寅崩于宣福殿在位十四年年五十三葬顯寧陵謚孝宣廟號高宗

年號

太建 十四

後主

宣帝長子諱叔寶字元秀小字黃奴母柳氏大建十四年正月丁巳以皇太子卽帝位元年癸卯帝荒于酒色不恤政事常使張麗華孔貴妃等八人夾坐江總孔範等十人預宴號為狎客是年秋自建鄴至荊州江

水色赤如血天外有如風水相激之聲帝設會捨身大赦天下禎明三年正月隋將賀若弼韓擒虎進軍宮城帝逃于井中以繩引之而出至京師見宥隋仁壽四年十一月壬子終于洛陽在位七年年五十二贈大將軍封長城縣公謚煬葬河南洛陽之芒山年號

至德 四 禎明 三

右陳五主共三十三年

陳氏土宇彌蹙于梁西不得梁漢北失淮淝以長

江為境

文帝初湘州之地為周軍所陷後克平之今鼎溫潭衡等州之地是也

有州

四十有二

地轉狹而州益多

郡百有九縣四百三十有八

宣帝大建中頻年北伐諸將累捷盡復淮南之地

吳明徹斬高齊將于壽春

更經畧淮北大破齊軍於呂梁及旋

師屬高齊亡又總軍北伐至呂梁周軍來拒又大

破之

自大建五年北伐七年破齊軍九年又破周將梁士彥悉得于梁淮北城鎮下邳胸山

旋為周軍所敗悉虜其眾

十年周將王明徹退師全軍沒于清

自是江北之地盡入于周復以長江為界

十二年周

將以淮西地來降又遣將克新野尋失之

及隋軍來伐遣將守狼尾灘

今峽州宜都縣界是

公安

今江陵府縣是

荆門安蜀地

今峽州夷陵縣界是

陵

今岳州

巴下並風靡退散

信州道大總管楊素自峽中舟師東下東之守

將相繼而破信州即今雲安郡歸州是也

隋軍自采石

隋將韓擒虎襲陷之

京口

六朝建都

南朝建都之地不過建康京口豫章江陵武昌數處

其強弱利害前世論之詳矣吳孫策以會稽為根本

文帝嗣立稍遷京口其後又嘗住公安又嘗都武昌

蓋往來其間因時制宜不得不爾及江南已定遂還

建鄴保有荆陽而魏蜀抗衡其宏規遠畧晉宋而下

不能易也故孫皓捨建鄴而之武昌吳因以衰梁元

帝舍建鄴而守江陵梁遂以亡李嗣王舍建鄴而還

洪府南唐遂不能以立王導斷然折會稽豫章之論
而以建鄴爲根本自晉而下三百年之基業導之力
也故孫皓議遷都武昌陸凱上疏曰武昌土地危險
非王都安國養民之處船泊則沈漂陵居則峻危童
謠云寧飲建鄴水不食武昌魚寧遠建鄴死不止武
昌居夫民謠本于天心乃以安居而比死足明天意
而知民所苦也蘇峻亂宗廟宮室並爲煨燼温嶠議
遷豫章三吳之豪請都會稽二論紛紜未有所適王
導曰古之金陵聖皇所居孫仲謀劉玄德皆言王者
之宅古之帝王不以豐儉移都苟冠衛文大帛之冠
何往不可若不續其麻樂土爲墟矣由是嶠等之議
不行齊蕭穎胄議遷夏口柳忱以巴峽未實不宜輕
捨根本搖動人心帝不從俄而巴東之兵至峽口遷
都之議遂息梁元帝臨荆峽二十年情所安戀不欲
歸建鄴故府臣僚皆楚人並欲都江陵周洪正諫曰
士大夫言聖王所根本無定處若黔首未見入建鄴
便謂猶列國諸王今日赴百姓心不可不歸建鄴南
唐嗣主用唐鑄計遷豫章而王都官舍軍壘十不容
其一二自公卿下至軍士莫不思歸自此論之六朝
以來都邑之議莫不以建康爲根本也

六朝宮殿

吳孫權遷都建鄴徙武昌宮室材瓦繕治太初宮吳實錄有曰臺城蓋宮省之所寓也有曰東府蓋宰相之所居也有曰西州蓋諸王之所宅也有曰倉城蓋儲蓄之所在也官室記云皆不出都城之內輿地志云都城二十里一十九步本吳宮址蓋謂是也晉琅瑯王渡江鎮建鄴因吳舊都修而居之卽太初宮爲府舍及卽帝位稱爲建鄴宮更明帝不改至成帝繕苑城作新宮窮極伎巧侈靡殆甚宋齊而下因之稱爲建康宮以此攷之六代官室門墻雖時有改築然

皆因吳舊址晉新宮在吳太初宮之東吳昭明宮孫起孫所在晉建康宮城西南惟元帝建鄴宮乃仍吳太初宮之舊今行宮之東北乃其地也

太初宮

建康實錄吳孫權黃武中徙武昌棟瓦而增起卽長沙王孫策故府在晉建康宮城西南卽臺城之西南也

建康宮

建康實錄晉成帝咸和七年新宮成名曰建康宮亦名顯陽宮注云卽今之所謂臺城也輿地志云在法

寶寺之南今在府北五里

新宮

晉謝安作新宮造太極殿欠一梁忽有梅木流至石頭城下因取爲梁殿成乃畫梅花于其上以表嘉瑞楊修有云玉案金鑪對御牀巋然應是魯靈光螭頭直上雙魚尾不讓西京舊柏梁

未央宮長樂宮建章宮長楊宮

南史宋前廢帝景和元年以東府城爲未央宮以石頭城爲長樂宮以北邸爲建章宮南第爲長楊宮東府城在古青溪橋東



金華宮

輿地志云梁大同中所築昭明太子蔡妃所居在青溪東

披香殿

楊修金陵詩注云在臺城後官庾子山詩云宜春苑中春已歸披香殿裡作春衣蓋指此也

靈和殿

在臺城內晉武帝時殿下柳本蜀郡所獻條如絲縷帝曰此柳風流可愛似張緒少年時緒字思曼楊修有詩云得地息深雨露偏丹墀左右玉堦前君王屬

意君知否好似風流一少年

六朝郊社

終吳之世未暇禮文宗廟社稷不見於史晉初置宗廟在吳都城宣陽門外輿地志云在縣東二里圖經云大社大稷壇在縣二里宋齊而下時有改易晉元帝二年作南郊在官城南十五里郭璞卜立之輿地志云在今縣城東南十八里圖經云古南郊壇在縣南十八里成帝作北郊壇于覆舟山之陽制度一如南郊實錄云北郊壇在縣東八里潮溝後東近青溪又按通典宋孝武帝大明三年移北郊于鍾山北原

道西今鍾山定林寺山巔有平基二所闊數十丈乃其地也南唐郊壇在長樂鄉去縣十二里遺址尚存今為藏冰之所

六朝郡國

三國鼎立之後土宇分裂得失不常魏武定西朔所

置郡國十二

新興 樂平 西平 南平

帶方 譙 樂陵 南陽

襄陽 南陽 南陽

襄陽 南陽 南陽

襄陽 南陽 南陽

而省者七

襄陽 南陽 南陽

襄陽 南陽 南陽

襄陽 南陽 南陽

襄陽 南陽 南陽

襄陽 南陽 南陽

襄陽 南陽 南陽

襄陽 南陽 南陽

得漢郡者五十四焉蜀先主於漢建安之間初置郡

九

巴東 巴西 梓潼 江陽 汝山

漢嘉 朱提 宕渠 涪陵 後主增二

漢嘉 朱提 宕渠 涪陵 後主增二

漢嘉 朱提 宕渠 涪陵 後主增二

漢嘉 朱提 宕渠 涪陵 後主增二

漢嘉 朱提 宕渠 涪陵 後主增二

雲安得漢郡者十有一焉吳大帝初置郡五臨廣

興古廬陵少帝景帝各四臨川歸命侯亦置十有二郡始安吳興

新安合浦新昌武平得漢郡者十有八焉晉武太康

元年既平孫氏凡增置郡國二十有三上陽頓丘

東莞襄城汝陰長廣廣寧昌黎新野

隨郡陰平義陽毗陵宣城南康晉安

寧浦始平畧陽省司隸置司州別立梁秦寧平

四州仍吳之廣州凡十九司隸冀兗荆徐揚青幽平

郡國一百七十三仍吳所置二十五仍蜀所置十一

置二惠帝不君中州盡棄永嘉南渡建鄴今建康也開基

九州之地有二焉自茲以降國分南北更王迭霸疆

理不常宋至孝武大明中州凡二十有二郡二百三

十有八縣千一百七十有九南齊繼統又置巴東一

郡餘竝因之為州二十有三郡三百九十五縣千四

百七十有四頻與元魏侵吞相得失蕭梁之時多沿

舊制天監中有州二十有三郡三百五十縣千二十

有五其後更有析置大同中州百有七郡縣亦稱於

此陳氏較之士宇彌蹙西不得蜀漢北失淮淝而以

長江為境有州四十有二是其地愈狹立名益多為

郡百有九縣四百三十有八此皆疆宇之列乎南者



也

六朝保守

晉蔡謨曰時有否泰道有屈伸暴逆之寇雖終滅亡方其強盛皆當詘而避之要終歸于大濟而已爲今之計莫若養威以俟時王羲之曰以區區江左營綜如此天下寒心久矣中興之業政以道勝寬和爲本力爭武功非所當作二人者能言之而不得行之行之而足以安江南者孫權一人耳陸瑁嘗勸權曰九域盤互之時率須深根固本愛力惜費陸遜嘗勸權曰施德緩刑寬賦息調權報之曰發調者蓋謂天下

未定事以衆濟若徒守江東修崇寬政兵自足用何以多爲顧坐自守可陋耳以此知權之志未嘗不在于天下然以傳考之亦未嘗求逞于中國曹公來侵則破之拒之而已治艦立塢築堤遏湖作涂塘明烽燧始終所以備魏者至矣及移牋于曹公曰足下不死孤不得安則權固未嘗得志也嘉禾中因蜀寇魏一攻淮南聞明帝東行遽則歛避諸將之攻樊城司馬懿救之亦引軍亟退自後世觀之謂之怯可也而權不以爲恥豈非天下之勢旣未有可投之隙與其力爭而取敗不若退守而待時也耶史稱權繼父兄

之業有臣以爲腹心股肱爪牙兵不妄動故戰少敗而江南安此權之所以爲智也及嗣王立諸葛恪爲政首侵邊以怒敵東興之戰幸捷顧不能持勝復違衆大舉一敗塗地恪旣喪軀而孫氏之業因以衰焉則權之兵不妄動利害果何如也其後孫皓用諸將計數侵盜晉鄙陸抗曰苟無其時雖復大聖亦宜養威自保不可輕動今不務力農富國審官任能明黜陟慎刑罰訓諸司以德拊百姓以仁而聽諸將狗名窮兵黷武動費萬計士卒凋弊寇不爲衰而我已大病矣夫爭帝王之資而昧十百之利此人臣之姦謀

非國家之良策也抗之言兼有陸瑁陸遜蔡謨王羲之之論而皓不之用此其所以亡也東晉自庾亮經營征伐皆不能有成謝安父子乘苻堅傾敗之餘圖之如恐不及也至于渡河入鄴訖無尺寸之得宋文自以富強詰戎兵于元道濟再行無功諸將以敗而胡馬遂至爪步梁武遭魏氏之亂陳慶之以數千兵入洛而嵩高之襲幾至殲盡及貪河南之地納叛將棄睦鄰而身國顛覆陳宣帝宇于北齊旋失淮泗于後周雖以桓温劉裕非常之才度越歷代諸將而温伐苻犍慕容皆幾成而敗裕

平南燕滅姚秦亦既得而失則六朝用兵攻伐之策
可見矣

形勢門第二

鍾阜

建康之東餘見寺苑門蔣山寺

圖經云在縣東北周回六十里高一百五十八丈東
連青龍山西臨青溪南自鍾浦下入秦淮北接雒亭
山漢末有秣陵尉蔣子文逐盜死於鍾山吳大帝爲
立廟封曰蔣侯吳錄云大帝祖諱鍾因改名曰蔣山
按丹陽記云京師南北並連山嶺而蔣山峇嶷巖異
其形象龍實作揚都之鎮諸葛亮嘗至京觀秣陵山

阜云鍾山龍盤蓋謂此也又按輿地志云鍾山本少
林木宋時使諸州刺史罷職還者栽松三千株下至
郡守各有差焉山之最高峯地有五願樹樹柞木也
宋元嘉中百姓祈禱率有應驗寰宇記云自梁以前
立寺七十所今存者六又按南史宋散騎常侍劉劭
經始鍾嶺之南以爲栖息聚石蓄水朝士雅素者多
從之游又雷次宗元嘉中開館雞籠山文帝爲築室
于鍾山西巖下謂之招隱館至齊周顒亦于鍾山西
立隱舍休沐則歸後顒出爲海鹽令孔稚圭作北山
移文以譏之舊經云晉謝尚齊朱應吳苞孔嗣之梁

阮孝緒劉孝標竝隱于此唐大曆中處士韋渠牟亦
隱此山號遺名子顏真卿題其所隱之堂曰遺名先
生三教會宗堂又陳后主與張機遊是山嘗以松枝
代麈尾故梅摯詩有千松麈尾之句又按文選沈
休文鍾山應教詩云靈山紀地德險峭資岳靈又云
勢隨九疑高氣與三山壯蓋美之也荆公絕句云偶
向松關覓舊題野人休誦北山移丈夫出處非無意
猿鶴從來自不知又一絕云澗水無聲遶竹流竹間
花影弄春柔茅簷相對坐終日一鳥一鳴山更幽又
一絕云終日看山不厭山買山終待老山間山花落

盡山長在山水空流山自閑今屬惟政鄉去縣十里

石城

建康之西

吳孫權沿淮立柵又於江岸必爭之地築城名曰石
頭常以腹心大臣鎮守之今石城故基乃楊行密稍
遷近南夾淮帶江以盡地利其形勢與長干山連接
輿地志云環七里一百步在縣西五里去臺城九里
南抵秦淮口今清涼寺之西是也諸葛亮論金陵地
形云鍾阜龍盤石城虎踞真帝王之宅正謂此也及
晉伐吳王濬以舟師沿江而下自三山抵石城劉夢
得金陵懷古曰王濬樓船下益州金陵王氣黯然收

千尋鉄索沈江底一片降幡出石頭荒苑至今生茂
草古城依舊枕寒流而今四海歸皇化兩岸蕭蕭蘆
荻秋宋順帝昇明元年以司徒袁粲出鎮於此由晉
以來常爲戰守之地左太冲吳都賦云戎車盈于石
頭蓋謂此也宋大明中以其地爲離宮及齊武帝爲
世子卽以爲世子宫城之東有巨石俗呼爲塘岡乃
王敦害周伯仁戴若思之處按建康實錄晉元帝永
昌元年敦收周顛戴淵殺於石頭城東塘頽石上百
姓寃之至今紀其處至陳宣帝太建二年其城復加
修築以貯軍食後主禎明元年徐孝克爲都官尚書

性清素常以石頭津稅給之唐武后光宅中徐敬業
舉兵使其徒崔洪渡江修石頭以拒之敬業分軍
三百人守之尋置爲鎮仍徙縣倉以實之故唐書地
理志云昇州有石頭鎮中宗神龍二年廢鎮卽移倉
于冶城德宗時浙江觀察使韓滉迺於石頭築五城
今遺址尚在江南野史汪台符上書陳民間九患爲
宋齊丘所沮後齊丘使人夜縛其口沈石城下先主
聞而歎之江淹侍始安王石頭城詩曰開局遶天邑
襟帶抱尊華何遜登石頭詩曰天暮遠山青潮去邊
沙出皆謂此也

朱雀航

晉咸康二年作朱雀門新立朱雀浮航在縣城東十四里對朱雀門南渡淮水亦名朱雀橋輿地志云南津大航橋也王敦作亂温嶠燒絕至是始用杜河橋法作之地志云朱雀門孔對吳都城宣陽明去六里爲御道夾御溝植柳自朱雀門南渡出國羅鄴金陵野步望宮柳詩云色承陽氣煖陰帶御溝清里俗相傳今桐樹灣相對浮橋卽其地也

真武湖

按建康實錄吳後主皓寶鼎元年開城北渠引後湖水流入新宮巡遶殿堂窮極伎巧至晉元帝始創爲北湖故實錄云元帝大興三年創北湖築長堤以遏北山之水東至覆舟山西至宣武城又按南史宋文帝元嘉二十三年築北堤立真武湖於樂遊苑之北湖中亭臺四所後黑龍見于湖側春秋使道士祠之至孝武大明五年常閱武于湖西七年又于此湖大閱水軍按輿地志云齊武帝亦常理水軍于此號曰昆明池故沈約登覆舟山詩南瞻儲胥館北眺昆明池蓋謂此也又于湖側作大竇通水入華林園天淵池引殿內諸溝經太極殿由東西掖門下注城南塹

故臺中諸溝水常縈流迴轉不舍晝夜又按南史元嘉二十三年造真武湖文帝于湖中立方丈蓬萊瀛洲三神山尚書右僕射何尚之固諫乃止今圖經云湖中有蓬萊方丈瀛洲三神山不知何所據也本朝天禧四年改爲放生池其後廢湖爲田中開十字河立四斗門以洩湖水跨河爲橋以通往來今城北十三里有古池俗呼爲後湖見作大軍教場處是也

城闕門第三

越城

春秋時越旣滅吳盡有江南之地於是築城江上以鎮江險圖經云周圍二里八十步在秣陵縣長干里後崔慧景寇建鄴蕭懿入援自采石濟岸頓越城舉火臺上鼓噪相慶茲建康之南也今南門外有越臺與天禧寺相對見作軍寨處是也

吳固城

圖經云在溧水縣西南九十里高一丈五尺羅城周圍七里二百三十步子城一百一里九十步勝公廟記吳時瀨渚縣也楚靈王與吳戰吳兵不利遂陷此城吳乃移瀨渚于溧陽南十里改爲陵平縣靈王崩平王立使蘇■爲將戰于吳吳軍敗收■陵平縣自

平王聽費無忌佞言伍胥奔吳闔閭用爲將舉兵破楚奔南海固城宮殿逾月煙焰不滅其城遂廢

金城

建康實錄金城吳築晉桓溫咸康七年出鎮江乘之金城後溫北伐經金城見爲琅琊時所種柳皆十圍因歎曰木猶如此人何以堪因攀枝執條泫然流涕楊修金城詩亦引此爲據又按古圖經晉中宗于金城立琅琊郡溫嘗爲琅琊內史至咸康七年出鎮金城前云琅琊蓋指此也今去府城三十五里

冶城

今天慶觀卽其地也本吳冶鑄之所因以爲名寰宇記晉元帝大興初以王導疾久方士戴洋云君本命在申而申地有冶金火相爍不利遂移冶城于石頭城東以其地爲園徐廣晉記云成帝適司徒府觀冶城園卽此也

琅琊郡城

寰宇記云晉元帝過江爲琅琊王國人立也其城在江乘縣界王隱晉書及山謙之南徐州記云江乘南岸蒲州岸有琅琊城其立琅琊內史以治之圖經云在縣東北六十三里今句容縣有琅琊鄉亦其地也

又按寰宇記齊武帝永明六年移琅琊郡于白下在縣北十八里圖經直以蒲州津城爲白下非也又按南史武帝永明六年于琅琊城講武習水步軍九年又幸其城講武觀者傾都梁徐欽業登瑯琊城詩曰表裡窮形勝襟帶盡巖巒登陴起遐望回首見長安

建康縣城

吳冶城東今天慶觀東是其地寰宇記云在縣西一里晉太康三年分淮水北爲建康縣上元之地居多同夏縣城

南史梁武帝以宋孝武大明元年生于秣陵縣同夏里三橋宅及卽位大同元年分同夏里爲同夏縣寰宇記云在城東十五里其地在長樂鄉

白下縣城

按圖經及寰宇記引輿地志云本江乘之白石壘也齊武帝以其地帶江山移琅琊居之唐武德元年罷金陵縣築城于此因其舊名曰白下正觀七年復舊治此地遂廢今攷唐書地理志云武德三年更江寧縣曰歸化八年更歸化曰金陵九年更金陵曰白下隸潤州正觀九年復更白下曰江寧前說興廢本末與此不同宜以唐史爲正又按南史齊武帝欲修白

下城難于動役劉係宗啓謫役在東者上從之後武帝講武白下履行其地曰係宗爲國家得此一城圖經云在西北十四里今靖安鎮北有白下城故基父老傳云卽此地也屬金陵鄉去府城十八里

臨沂縣城

按輿地志云晉成帝咸康三年分江乘縣置臨沂縣琅琊郡陳亡廢矣在府城北三十里

蔣州城

杜佑通典隋平陳於石城置蔣州寰宇記輔公祐據江東用爲揚州唐趙郡王孝恭平公祐又於其城置

揚州大都督後徙揚州於廣陵此城遂廢

臺城

建康實錄晉成帝咸和七年新宮成名建康宮注卽今之所謂臺城也在縣東北五里周回八里又按輿地志云同泰寺南與臺城隔路今法寶寺及圓寂寺卽古同泰寺基故法寶亦名臺城院以此考之法寶圓寂寺之南蓋古臺城地也今之基址尚在元和初陸喬家于丹陽一夕有叩門者曰我沈約也呼左右召青箱來俄一兒至約指謂曰此吾子也近從吾過臺城命爲感舊詩因諷曰六代舊山川興亡幾百年

繁華今寂寞朝市昔喧闐夜月瑠璃水春風柳色天
傷時與懷古垂淚國門前楊修有詩云六朝遺跡好
山川宮闕灰寒草樹烟江令白頭歸故國多情合賦
黍離篇

檀城

輿地志云本謝玄之別墅太傅謝安與玄奕碁所勝
者至宋屬檀道濟故名檀城圖經云在縣東八里今
按建康實錄在墅城東八里非去縣八里也地圖謂
之城子墅今清風鄉有城子墅在黃城橋之西卽其
地去府城四十里

石闕

縣北五里有四石闕在臺城之門南高五丈廣三丈
六寸梁武帝所造及成朝士銘之時陸倕字佐公其
文甚佳士流推伏侯景作亂焚燒宗廟城郭府寺百
無一存尋高麗百濟等國入貢見其凋殘遂哭于闕
下楊修有詩云雙石巍巍慰眼青滿朝珍重佐公銘
宮城府寺俱灰燼翻使夷人謾涕零

朱雀門

晉都城南門也按晉新宮立三門于南面正中曰
宣陽與朱雀門相對王導嘗出宣陽門望牛首山兩

峰相向導指爲天闕牛首山在今城南門近東面勢正與桐樹灣相對以此地考之今上元在南廂也

白下門

兩漢地里志未有白下縣按南史宋明帝時聞人謂宣陽門爲白門以爲不祥甚諱之右丞江謚誤犯帝變色曰白汝家門按唐會要及地理志武德二年更江寧曰歸化八年又更歸化曰金陵九年更金陵曰白下正觀九年又更白下曰江寧則白下縣始于此然未知其得名之因一說謂春秋時楚使子木之子勝處吳邑爲白公金陵吳邑也恐白之得名自此始

一說謂本江乘縣之白石壘以其地帶江山之勝故爲城于此曰白下城東門謂之白下正其往路也一說謂齊武帝時已闕武于白下自唐武德以後因之也荆公東門詩有東門白下亭之句參寥訪荆公詩曰苦嫌榮祿早收身歸與漁樵共隱淪白下門西山迤邐興來長是岸烏巾徐師川詩曰廣陵才過又金陵白社還思白下亭鴈翅■連千里浪蛾眉山出兩峯青正謂此也

丹陽門

丹陽丹揚丹徒各自有義按前漢志秦鄣郡乃漢丹

陽郡武帝二年更名也九域志引江南地志云漢丹陽郡北有赭山丹赤故因名曰丹陽至東晉始以丹揚爲義按地理志建鄴秣陵丹揚句容溧陽江寧皆隸丹陽郡屬揚州所統注云丹陽山多赤柳在郡西故曰丹揚丹徒春秋時謂之朱方按建康實錄孫權鎮京口注曰秦始皇發赭衣刑徒伐山開道故名邑曰丹徒

樓臺門第四

亭館附

落星樓

圖經在縣東北臨沂縣前吳大帝時山上置三層樓

樓高以此爲名左太冲吳都賦云饗戎旅乎落星之樓是也今石步相去一里半有落星墩里俗相傳卽當時建樓處今去城四十里

烽火樓

圖經云在石頭城西南最高處楊修詩注云沿江築臺以舉烽燧自建康至江陵五千七百里有警半日而達按南史宋文帝元嘉二十七年魏太武至瓜步聲欲渡江始議北侵朝士多有不同至是帝登烽火樓極望不悅謂江湛曰北伐之計同議者少今日貽大夫之憂在予過矣又齊武帝登烽火樓詔羣臣賦

詩蕭穎胄詩合旨帝謂穎胄曰宗室便不乏才

景陽樓

輿地志云宋元嘉二十二年築至孝武大明中紫雲出景陽樓因名之今法寶寺西南遺址尚存

入漢樓

東晉書云義熙八年于石頭城東起入漢樓在城西門外

梁昭明書臺

舊傳梁昭明太子著書于此今遺址尚存蔣山定林寺後山北高峯上

衛玠臺

晉書云玠字叔寶初字豫章南辭王敦歸建鄴都人聞其姿容觀者如堵尋以疾終年二十七時人謂之看殺塋江寧楊修有詩云年少才非洗馬才珠光碎後玉光埋江南第一風流者無復羊車過舊街其臺傳在城南十里

周處臺

府雉東南有故臺基曰周處臺今鹿苑寺之後梅摯記云按西晉史處字子隱義興陽羨人弱冠時好馳騁不修細行州曲患之自知爲衆所惡慨然有改勵

之志里人以三害切諷於是射虎斬蛟往見陸雲具以誠告曰古人學道貴朝聞夕死君前途尚可第患志之不立何憂名之不彰遂退而嚮學有文言必信行必謹如是期年州府交辟仕吳爲東觀左丞吳平入洛界遷郡太守率有善狀拜御史中丞凡所計劾不避權貴卒樹功名沒世遠耀噫天地至大根一氣陶萬化未始無過陰陽寒暑小有繆戾則從而改之卒歸大順而况于人乎古聖賢本天地之性亦未嘗諱過後之人不獨諱之而已抑又從而文之自底悔尤良可嗟惜惟子隱少而不逞長乃自悟

一旦畚然去惡卽善遂爲名世忠賢可不重乎則中人所稟因物染遷爲時註誤德有小青言小疵未甚子隱之害于而鄉又何憚改爲哉予因來是臺新是堂非止卜高明之居包遊覽之勝而與民同樂亦將有激時世云

九日臺

南史齊武帝永明四年四月作商飈館于孫陵岡世呼爲九日臺十道四蕃志云武帝九月九日以宴羣臣孫陵岡卽吳大帝將陵今在鍾山鄉蔣廟之西南俗呼爲松陵岡去縣十二里楊修有詩云甲光如水

戟如霜御酒杯浮菊半黃東日西風滿天仗簫韶一部奏清商

雨花臺

梁武帝時有雲光法師講經于此感得天雨賜花天厨獻食荆公有詩云盤長干有絕陁并包佳麗入江亭新霜浦淑綿綿靜薄晚林巒往往青楊無爲有詩云空書來震旦康樂造淵微貝葉深山譯曼花半夜飛香清雖透筆藥散不需衣舊社白蓮老遠公應望歸

新亭

晉初元帝渡江僕射周顓與羣臣遊宴坐中歎云雖風土不殊舉目有江山之異因而流涕王導曰諸公當須戮力中原以壯王室何爲作楚囚悲邪衆皆肅然整容宋孝武卽位于新亭僕射王僧達改爲中興亭城南十五里俯近江渚楊修有詩云滿目江山異洛陽北人懷土淚千行不如亡國中書令歸老新亭是故鄉

五馬亭

晉元帝與彭城王玄西陽王羨南頓王宗汝南王宏南渡之後當時讖云五馬浮渡江一馬化爲龍謂此

也亭今廢其地屬金陵鄉去城西二十五里幕府山之側

賞心亭

丁晉公建也公以家藏袁安臥雪圖張于其屏乃唐周昉筆經十四太守無敢覬覦者後爲一太守以凡筆畫蘆鴈易之王琪密學來作守登臨賦詩曰千里秦淮在玉壺江山清麗壯吳都昔人已化遼天鶴舊畫難尋卧雪圖冉冉流年去京國蕭蕭華髮老江湖殘蟬不會登臨意又噪西風入坐隅荆公有詩云檻折簷傾野水傷臺城佳氣已消亡雖披草莽尋千古

獨倚青冥望八荒坐覺塵沙昏遠眼忽看風雨破驕陽扁舟此日東南興欲望江流萬里長又詩云霸氣消磨不復存舊朝臺殿只空村孤城倚薄青天近細雨侵尋白日昏稍覺野雲成晚霽却疑山月是朝暎此時江海無窮興醒客無言醉客喧

白下亭

李白金陵白下亭留別詩云驛亭三楊樹正當白下門王荆公有詩云東門白下亭摧甃蔓寒葩則亭在東門明矣荆公舊宅在今報寧寺故基其詩有門前秋水可揚舠有意西尋白下亭之句今廢矣

東冶亭

晉太元中於汝南灣東南置亭爲士大夫餞送之所
楊修有詩曰忍淚相看酒共持一生心事幾人知年
年折盡東亭柳此別綿綿無盡期舊傳在縣東八里
翠微亭

城西五里清涼寺山頂南唐時建林逋有詩云亭在
江干寺清涼更翠微陳軒金陵詩集註云清涼寺翠
微亭最爲佳處

三山亭

城西五里清涼寺石頭城之西面對三山其地屬金

陵鄉

儒學館

南史宋文帝元嘉十五年立儒學館于北郊命雷次
宗居之卽今覆舟山之南也

湯泉館

徐鉉有湯泉舊館詩今遺基尚存在神泉鄉湯山之
下

儀賢堂

建康實錄吳時造號爲中堂楊修詩注云在臺城內
梁武帝謙恭待士大通中有四人來年七十餘鶉衣

躡履行可經年無人知者帝召入儀賢堂給湯沐解御服賜之帝問三教九流及漢舊事了如目前帝心異之舉朝無識者惟昭明太子識而禮重之四人喜揖昭明如舊交時目爲之四公子楊修有詩云兩兩鶉衣白髮翁講延談柄坐生風昭明太子歡相得應與商山四皓同

袂襖堂

楊修金陵詩注云在縣北五里臺城內天淵池中架石引水爲流杯之所六朝上巳日宴錫公卿于此輿地志云宋元嘉二十二年鑿天淵池造景陽樓今法寶寺之南有景陽樓古基側有池舊傳卽天淵池歲久湮沒今不復有堂矣

聽箏堂

晉元帝幸謝安宅命讌安侍坐使桓伊吹笛爲一弄畢又撫箏按徽金縢曲聲伊慷慨俯仰可觀安淚下霑襟乃越席捋其鬚曰使君于此不凡帝甚有媿色此堂基至今樵采者不敢近楊修詩云鴈柱鸞絃十有三南山安石位嵒巖逡巡奏罷金縢曲堂上霑襟嘆不凡

蠶室

隸縣北七里耆闇寺前沙市中六朝皇后親蠶之所也楊修詩云摘繭抽絲女在機茅簷葺箔舊堂扉年年桑柘如雲綠翻織誰家錦地衣

三閣

陳後主至德二年於光昭殿前起臨春結綺望仙三閣高數十丈並數十間其牕牖戶壁欄檻之類皆以沈檀爲之又飾以金玉間以珠翠外施朱簾內設寶帳其服玩之屬瑰麗皆近古所未有每微風至香聞數里朝日初照光映後庭其下積石爲山引水爲池植以奇樹雜以花藥後主自居臨春閣張麗華居結

綺閣

麗華本兵家女以織簾爲業

龔孔二貴妃居望仙閣並複道

交相往來以宮人有文學者袁大捨等爲女學士後主每引賓客江揔等對貴妃遊宴則使諸貴人及女學士與狎客賦詩互相贈答采其尤艷麗者以爲詞被以新聲采宮女有容色者千百數習而歌之分部迭進持以相樂其曲有玉樹後庭花臨春樂等麗華聰慧有神采嘗于閣上靚粧臨于軒檻宮中遙望飄若神仙才辯強記善候人顏色薦諸宮女後宮咸德之又工厭魅之術假鬼道以惑後主置淫祀于宮中聚諸女巫使之鼓舞時後主怠於政事百官啓奏並

因宦者蔡臨兒李善度進請後主每置張麗華于膝上共決之大臣有不從者因而譖之言無不聽於是張孔之權熏灼四方内外交結貨賄公行賞罰無常綱紀贅亂矣及隋軍克臺城二妃與後主俱入井隋軍出之晉王廣命斬之于青溪柵下北史高穎傳隋平陳晉王廣欲納張麗華穎曰武王伐紂戮妲己今陳平不宜取麗華乃命斬之當以北史爲正

馳道

宋孝武帝作馳道自閶闔北出承明抵玄武湖十餘里爲調馬之所也楊修有詩云路平如砥直如絃官

柳千株拂翠煙玉勒金天下駿急于奔電更揮鞭

齊雲觀

陳後主禎明二年建國在臺城内人歌曰齊雲觀寇來無際畔楊修詩云上界笙歌下界聞縷金羅袖鬱金裙倚欄紅粉如花面不見巫山空暮雲

層城觀

亦名穿針樓

輿地志云齊武帝七月七日使宮人集此是夕穿針以爲乞巧之所亦曰穿針樓在臺城内楊修有詩云秋星如彈月如梳宮妓香添乞巧爐萬縷千針同一意眼穿腸斷得知無

桂林苑

寰宇記云桂林苑在縣北落星山之陽左太冲吳都賦云數軍實乎桂林之苑卽此地也

樂遊苑

輿地志云在晉爲園宋元嘉中以其地爲北苑更造樓觀後改爲樂遊苑宋孝武大明中造正陽林光殿于內之亂焚毀畧盡陳天嘉六年更加修葺陳亡遂廢又按實錄宋文帝元嘉十一年三月禊飲于樂遊苑會者賦詩顏延之爲序南史梁大通三年武帝幸樂遊苑時新造兩刀稍帝因賜羊侃

河南國紫騮馬試之侃執稍上馬左右擊刺特盡其妙觀者登樹樹俄而折因號其稍爲折樹稍及陳宣帝卽位北齊使常侍李駒駉來聘賜宴樂遊苑尚書令江撝作詩以贈之寰宇記云其地在覆舟山南去縣六里

上林苑

南史宋孝武大明三年於真武湖北立上林苑建康實錄云在縣北十三里有古池俗呼爲飲馬塘楊修詩注云其苑連雞籠山在縣北七里

芳林苑

寰宇記云芳林苑一名桃花園本齊高帝舊宅在府城之東秦淮大路北武帝永明五年嘗幸其苑禊宴王融曲水詩序云載懷平浦乃眷芳林蓋此也又按南史齊時青溪宮改爲芳林苑梁天監初賜南平元襄王爲第益加穿築果木珍竒窮極雕靡命蕭子範爲之記蕃邸之盛無過焉

芳樂苑

齊東昏侯方在位時與宮人於闕武堂武會皇帝正位闈人行儀帝戎服臨視又于闕武堂爲芳樂苑竒極麗多種樹木日與潘妃放恣褻瀆不可言明帝

崩竟不一日蔬食居處衣服無改常潘妃生女百日而亡制斬衰杖經衣悉粗布羣小來弔盤旋坐地舉手受執蔬膳積旬不聽音樂左右直長闈豎等共營肴羞爲天子解又于苑中立店肆模大市日游市中雜所貨物與宮人闈豎共爲禪販以潘妃爲市令自爲市吏錄事將鬪者就妃罰之帝小有得失潘則杖之開渠立埭躬自引船埭上設店坐而屠肉于時百姓歌云闕武堂種楊柳至尊屠肉潘妃酤酒

江河門第五

溝渠溪井附

大江

西接江寧界東接句容界北接真州六合縣界沿流一百二十里按三國志吳書魏文帝有渡江之志徐盛從建鄴築圍上設假樓江中浮船文帝到廣陵墜圍愕然彌漫數百里而江水盛長便引退文帝嘆曰魏雖有武騎千羣無所用也又按江南野史周世宗問孫忌江南虛實忌曰長江千里險過湯池可敵十萬之師世宗聞而忌之

秦淮

秦始皇東巡會稽經秣陵因鑿鍾山斷金陵長隴以疏淮或云斷金陵長隴乃方山也其淮本名龍藏浦上有二源一

源發自華山經句容西南流華山在句容縣界一源

發自東廬山經溧水西北流入江寧界東廬山在溧水縣東南十

五里高六十八丈周回二十里山西一源入秦淮二源合自方山埭西注大

江其分派屈曲不類人功疑非秦皇所開而後人因名秦淮者以鑿方山言之楊修詩曰一氣東南王斗牛祖龍潛爲子孫憂金陵地脉何曾斷不覺真人已姓劉

直瀆

吳後主孫皓所開隸鍾山鄉去縣三十五里西至霸埂東北接竹港流入大江楊修詩注云瀆在幕府山

東北長十四里闊五丈深一丈初開之時晝穿夜復自塞經年不就傷足役夫臥其側夜見鬼物來填因嗟嘆曰何不以布囊盛土棄之江中使吾徒免殫力于此傷者異之曉白有司如其言乃成瀆道直故名曰直瀆輿地志曰白下城西南蟹浦浦西北有直瀆伏滔北征記云吳將甘寧墓在此俗云墓有王氣孫皓惡之乃鑿其後爲直瀆又按晉書蘇峻舉兵溫嶠帥師救京師遣王愆鄧期兵爲前鋒次直瀆卽此地也楊修有詩曰晝役人功夜鬼功陽開陰闔幾時終不聞擲土江中語爭得盈流一水通

橫塘

吳大帝時自江口沿淮築堤謂之橫塘楊修有詩云早潮纔過晚潮來一一軒窓照水開鑑面無塵風不動分明倒影見樓臺

青溪

建康實錄吳赤烏四年冬鑿東渠名爲青溪寰宇記云青溪在縣東六里闊五丈深八尺以洩真武湖水輿地志云青溪發源鍾山入于淮連綿十餘里溪口有埭埭側有神祠曰青溪姑今縣東有渠北接覆舟山近後湖里俗相傳此青溪也其水迤邐西出至

今上水閘相近皆名青溪陶季直京都記云京師鼎族多在青溪埭尚書孫瑒尚書令江摠宅當時並列溪北又南史齊永明元年望氣者言新林婁湖有王者氣帝廼築青溪舊宮作新婁湖苑以厭之又實錄云郝僧施泛舟溪中每經一曲作詩一首隋煬帝平陳斬張麗華孔貴妃二人于此柵下楊修有詩云傾城傾國兩妃嬪此地聞名不見人潛想舊時紅粉面落花風裡步香塵

潮溝

輿地志潮溝吳大帝所開以引江潮建康實錄云其

北又開一瀆北至後湖以引湖水今俗呼爲運瀆其實自古城西南行者是運瀆自歸蔣山寺門前東出至青溪者名潮溝其溝向東已湮塞西則見通運瀆按實錄所載皆唐事距今數百年其溝日益湮塞未詳所在今府城東門外西抵城濠有溝東出曲折當報寧寺之前里俗亦名潮溝此近世所開非古潮溝也

霹靂溝

王荆公詩云霹靂溝西路柴荆四五家憶曾騎款段隨意入桃花在城東五里

北渠

吳後主引北湖水入宮城巡遶堂殿極機巧費役萬工楊修有詩云金殿分來玉砌流黑龍湖撒鳳池頭後庭花落恩波斷翻與南塘作御溝在城北二里

蟹浦

輿地志云白下城西南有蟹浦源出鍾山北流九里入大江在城西北十六里

覆杯池

晉元帝中興頗以酒廢政丞相王導奏諫帝因覆杯于池中以爲誠楊修有詩云金杯覆處舊池枯此後

還曾一醉無東晉中興股肱力元皇亦學管夷吾今城北三里西池是也

落义池

蔣山寶公塔之東悟真菴前舊傳迦毗羅神隋梵僧密多至此與神交戰落义于此池因以得名

三巖石

臺城內千福禪院本梁同泰寺後吳順義二年置院前有醜石四各高丈餘又三巖山西有白蓮閣閣下有小石池面方一丈餘言是陳時景陽井今有古石井欄其上本鐫刻文字悉已殘毀惟城哉二字可辨

今名法寶院楊修有詩曰蘿蔓藤花歲自添露痕還似雨痕霑莫將廢苑爲閑地猶可巖巖使且瞻

邀笛步

舊名蕭家渡在城東南青溪橋之右今上水閘是也晉書云桓伊善樂盡一時之妙爲江左第一有蔡邕柯亭笛常自吹之王徽之赴召京師泊舟青溪側伊素不與徽之相識自岸上過船中客稱伊小字曰此桓野王也徽之令人諭之曰勝聞君善吹笛爲我一奏伊是時貴顯素聞徽之名便下車踞胡牀爲作三調弄畢便上車去客主不交一言故今名爲邀笛步

也

迎擔湖

南徐州記云費縣西北八里有迎擔湖昔晉元嘉中元帝南遷衣冠席卷過江客主相迎湖側遂以此爲名在府西北五里石城後其湖溉田三十里

太子湖

吳宣明太子孫登所創謂之西池晉元帝卽位明帝爲太子更加修之多養武士於池內築土爲臺時人呼爲太子西池建康實錄云晉太元十年夏四月符堅爲姚長慕容冲所遷遣使求救詔太保謝安率衆

救秦帝自行西池在城北六里周回十里

蘇峻湖

南徐州記云迎擔湖西北有蘇峻湖本名曰石陂建康實錄晉成帝咸和二年蘇峻舉兵于石頭陶侃溫嶠庾亮陣于白石使將軍楊謙攻于石頭峻輕騎出戰謙詐奔白石壘峻逼之纔交鋒峻墜馬侃督護李陽臨陣斬峻于白石陂岸至今呼此陂爲蘇峻湖在城北十五里周回十里

半陽湖

輿地志云江乘縣南有半陽泉半冷半熱又南徐州

記云江乘縣南有半陽泉半冷半熱熱處可爛物冷處如水熱處魚入冷處卽死冷處魚入熱處亦死民種稻則溉熱水一年再熟今廢楊修有詩云江南龍節水爲鄉水不絕陰又半陽一片湖光共深淺兩般泉脉異溫涼在城東北四十里周回十五里

絳巖湖

圖經云在句容縣西南三十里源出絳巖山周回二十里溉田一百頃舊收歲課錢二百二十貫咸平三年正月奉敕除放

固城湖

圖經云水路在溧水縣南九十五里東西二十五里
南北三十里有四派東經五堰經常州宜興縣界入
太湖

丹陽湖

圖經云在溧水縣西八十里與太平州當塗縣分界
昔唐李太白常遊此湖酷愛其景乃張帆載酒縱意
往來而作詩曰湖與元氣連風波浩難止天外賈客
歸雲間片帆起龜遊蓮葉上鳥宿蘆花裡少婦棹輕
舟歌聲逐流水

溧陽源

圖經云在本縣西北四十里曹姥山西經溧水縣東
流入縣界又南流三十里入長塘湖一名瀨水吳越
春秋云伍子胥奔吳至瀨渚遇女子因跪乞食女食
之授以壺漿誠曰勿言既濟女已投水後子胥伐楚
還投金于瀨水以報之須臾有嫗行哭而來曰吾女
三十不嫁遇窮人食之投水而死乃取金以歸水次
有碑李白文

五馬渡

圖經云在縣西北二十三里幕府山之前晉元帝與
彭城等五王渡江處按晉書太安之際童謠云五馬

浮渡江一馬化爲龍及永嘉中元帝登大位乃其符
云五馬之名取此

桃葉渡

圖經云在縣南一里秦淮口桃葉者晉王獻之愛妾
名也其妹曰桃根獻之詩曰桃葉復桃葉渡江不用
楫但渡無所苦我自迎接汝不用楫者謂橫波急也
嘗臨此渡歌送之楊修有詩云桃葉桃根柳岸頭獻
之才調頗風流相看不語橫波急艇子翻成送莫愁

麾扇渡

圖經云在縣東南四里故朱雀航之左晉廣陵相陳

敏反南渡江時假顧榮丹陽內史榮發舟南岸敏率
衆萬餘人出不獲濟以白羽扇麾之其軍遂自潰因
以爲名也楊修有詩云旌旗爍日刃凝霜甲光如龍
人似狼羽扇一麾風偃草策勳多謝顧丹陽

白鷺洲

圖經云在城西南八里周回十五里對江寧之新林
浦唐李白詩云三山半落青天外二水中分白鷺洲
長命洲

梁武帝放生之所也在石頭城前帝日市鵝鴨雞豚
之屬放此洲名爲長命洲置戶十家常以粟穀餵飼

歲各千石而爲狐狸所食及掌戶竊而烹者各半輿地志魏使李恕來聘帝時於此放生問恕曰北主頗知此事乎對曰魏國不殺亦不放帝無以應之楊修詩曰梁武慈悲不鼎烹蒙恩秦養亦虛名狐狸口腹應潛飽就死多于日放生

葛仙丹井

仙公葛玄煉丹井也按建康實錄吳大帝好道術玄嘗與遊處後玄白日昇天其井尚存外有石欄相傳云南唐所造今去城四十里方山頂上是也

景陽井

亦名胭脂井

臺城中景陽宮井也按南史隋克臺城陳後主與張麗華孔貴妃俱入井隋軍出之故杜牧之詩云三人出管井謂此也其井有石欄上多題字舊傳云欄有石脉以帛拭之作胭脂痕或云石脉之色類胭脂故云圖經不載楊修有詩云擒虎戈矛滿六宮春花無樹不秋風蒼惶益見多情處同穴甘心赴井中唐李白金陵歌曰石頭巉巖如虎踞凌凌欲過滄江去鍾山龍盤走勢來秀色橫飛歷陽樹四十餘帝三百秋功名事跡隨東流白馬小兒誰家子泰清之歲來關囚金陵昔時何壯哉席卷英豪天下來冠蓋散爲雲

霧盡金輿玉座成寒灰扣劍悲吟空咄嗟梁陳白骨
亂如麻天子龍沈景陽井誰歌玉樹後庭花此地傷
心不能道目下離離長春草送爾長江萬里心他年
來訪商山皓

應潮井

蔣山頭陀寺中塔記云梁大同元年後閤舍人石興
造山頂第一峯佛殿後有一井泉與江潮盈縮增減
相應楊修詩云碧甃時時減復增山頭海面密相應
古來泉脉誰穿鑿潮落潮生不暫澄

藏冰井

覆舟山上有凌室乃六朝每歲藏冰于此也楊修詩
云尤喜凌人職未墮閉藏出納示箴規戰兢國步艱
難者常似臨深履薄時在城東北十里

六朝事跡編類卷上



國家圖書館, NATIONAL CENTRAL LIBRARY, TAIWAN, R.O.C.

六朝事迹編類卷下

宋新安張敦願編
明新安吳瑄校

山岡門第六

石碗山

碗牛
委切

輿地志云秦始皇時望氣者云江東有天子氣乃東遊以厭之又鑿金陵以斷其勢今方山石碗是其所斷之地也孫盛云東至方山有直瀆自瀆至北山或云是秦時所掘山今方山西九里有大壘枕淮合壘悉是石名石碗京師溝塘累石悉鑿此壘取之在城

東南四十五里

天關山

晉元帝卽位起宮殿城闕郭璞云闕不便王導乃指牛頭山爲天關楊修有詩云牛頭天際碧疑嵐王導無稽示妄談若指遠山爲上關長安應合指終南

鳳臺山

宋元嘉中鳳凰集于是山乃築臺于山椒以旌嘉瑞在府城西南二里今保寧寺是也唐李白詩曰置酒延落景金陵鳳凰臺長波瀉萬古心與雲俱開昔時有鳳凰鳳凰爲誰來鳳凰去已久正當今日回明君

越義軒天老坐三台豪士無所用彈琴醉金罍東風吹山花安可不盡杯六帝沒幽草深宮冥綠苔置酒勿復道歌鐘但相催又詩曰鳳凰臺上鳳凰遊鳳去臺空江自流吳時花草埋幽徑晉代衣冠成古丘三山半落青天外二水中分白鷺洲總爲浮雲能蔽日長安不見使人愁宋齊丘有詩云嵯峨壓洪泉峯峿撐碧落宜哉秦始皇不驅炙不鑿上有布政臺八顧皆城郭山蹙龍虎健水黑螭蜃作白虹欲吞人赤驥相燁爍畫棟泥金碧石路盤繞埗倒挂哭月猿危立思天鶴鑿池養蛟龍栽桐棲鸞鶯梁間燕教雛石罅

蛇懸殼養花如養賢去草如去惡日晚嚴城鼓風來
蕭寺鐸掃地驅塵埃剪蒿除鳥雀金桃帶葉摘綠李
和衣嚼貞竹無盛衰媚柳先搖落塵飛景陽井草合
臨春閣芙蓉如佳人迴首似調謔當軒有直道無人
肯駐脚夜半鼠勃率天陰鬼敲椽松孤不易立石醜
難安着自憐啄木鳥去蠹終不錯晚風吹梧桐樹頭
鳴噪噪叢叢江令石青苔何淡薄不話興亡事舉首
思眇邈吁哉未到此偏劣同尺蠖籠鶴羨鳧毛猛虎
愛蝸角一日賢太守與我觀橐籥往往獨自語天帝
相唯諾風雲偶不來寰宇銷一畧我欲烹長鯨四海

爲鼎鑊我欲取大鵬天地爲罾絜音勺絜也安得生羽

翰雉飛上寥廓

其詩刻今在保寧寺

覆舟山

寰宇記云在城北五里周回二里高三十一丈東接
青溪北臨真武湖狀如覆舟因以爲名輿地志云宋
元嘉中改名真武山以其臨真武湖山復有真武觀
故也晉北郊壇宋藥園壘樂遊苑水井甘露亭皆在
此山

幕府山

寰宇記云在城西北周回三十里高七十丈東北臨

直瀆浦西接寶林山南接蟹浦輿地志云臨沂縣東八里有幕府山寰宇記晉元帝自廣陵渡江建康城荒落以府第居縣北山下因以幕府山為名圖經云丞相王導建幕府於此山因名之山上有虎跑蒲包切也泉其西巔有仙人臺宋明帝高寧陵在山西王導温嶠亦葬山西又按寰宇記云陳武帝破北齊軍四十六萬於幕府山下至後主禎明中嘗幸此山校獵虞世南獻賦以美之楊修有詩云六代繁華一瞬間平蕪遠樹不勝閑倚樓天暝雲如幕知是琅琊幕府山

雞籠山

寰宇記云在城西北九里西接落星澗北臨栖玄塘輿地志云雞籠山在覆舟山之西二百餘步其狀如雞籠因以為名按南史宋文帝元嘉十五年立儒館于北郊命雷次宗居之次宗因開館于雞籠山齊高帝嘗就次宗受禮及左氏春秋又竟陵王子良嘗移居雞籠山下集四學士抄五經百家為四部要畧于卷又按宋文帝元嘉中改為龍山以黑龍嘗見真武湖此山正臨湖上因以為名今去縣六里晉元帝明帝成帝哀帝四陵皆在山南中有佛寺五所

方山

寰宇記云山高一百一十六丈周回二十七里圖經云四面方如城東南有水下注長塘流漑平陸又按輿地志云湖熟西北有方山頂正方上有池水山謙之丹陽記曰山形方如印故曰方山亦名天印山秦始皇鑿金陵此方是其斷者文選謝靈運東出鄉里相送至方山靈運嘗賦詩其畧云解纜又流潮懷舊不能發又按南史宋何尚之爲尚書令元嘉末致仕于方山著退居賦以明所守議者咸謂尚之不能固志後果然又按齊武帝嘗幸方山顧左右曰朕欲經

始山之南復爲離宮期勝新林苑徐孝嗣荅曰繞黃山欵牛首乃盛漢之事今江南未廣願少留神乃止圖經謂齊武帝于方山築苑不知何所據而云

攝山

寰宇記云周回四十里高一百三十二丈東連畫石山南接落星山陳江總攝山棲霞寺碑云南徐州琅琊郡江乘縣有攝山其狀似繖亦名繖山尹先生記云山多草藥可以攝養故以攝爲名南史齊明僧紹往江乘攝山今棲霞寺卽其宅也今去城四十五里

東山

上元縣有兩東山一在崇禮鄉今土山是也晉書謝安寓居會稽棲遲東山此安之舊隱也後于土山營築以擬東山今去縣二十里一在鍾山鄉蔣廟東北宋劉劭隱居之地南史劭嘗經始鍾嶺以爲棲息及造園宅名爲東山今去縣十五里陳軒金陵集載李白李建勳東山詩皆指土山而作

白下

圖經云舊屬江乘縣周回八里高八十丈東接竹堂山南接蔣山北連攝山西有水下注平陸輿地志云階礎碑石悉出此山南史梁散騎常侍韋載有田十餘頃在江乘縣之白山天嘉元年遂築室而居屏絕人事不入籬門者十載今去縣二十里

濁山

圖經云在溧水縣東南十里高一十丈周回五里山北濁水出焉輿地志云溧水縣有濁山下有濁水卽秦淮之源也

湯山

寰宇記云在縣東北其西接雲穴山山不甚高無大林木有湯泉出其水大小凡六處湯礪繞其東南四時常熱禽鳥之類入之輒爛以煮豆穀終日不熟草

木濯之轉見鮮茂舊有湯泉館今廢去縣五十里

大壯觀山

圖經云在城北一十八里周回五里高二十丈東連蔣山西有水下注平陸南臨真武湖北臨蠡湖舊經謂陳宣帝起大壯觀於此山因以爲名南史宣帝大建十一年八月幸大壯觀因大閱武命都督任忠領步騎十萬陣于真武湖上登真武門觀宴羣臣因幸樂遊苑設絲竹之會仍重幸大壯觀振旅而還

臨沂山

圖經云在城東北四十里周回三十里高四十丈東

北接落星山西臨大江西南有舊沂縣城

祈澤山

舊經云初法師嘗結茅于此有龍女來聽講旣而神泉涌于講座下後遂爲祈禱水旱之所山因此得名高五十丈周回十里東連彭城山北連青龍山今去縣二十三里

東廬山

圖經云在溧水縣東南一十五里高六十八丈周回二十里有三源一出山西流入秦淮一自山東北流入馬沈港一自山東南吳漕流入丹陽湖丹陽記云

溧水縣東有廬山與丹陽分界俗傳云以廬舍爲名又云嚴子陵嘗結廬于此

廬龍山

圖經云在城西北十六里周回五里高三十六丈東有水下注平陸西臨大江舊經云晉元帝初渡江到此見嶺山連綿接石頭城真江上之關塞以此地廬龍因以爲名

馬鞍山

圖經云以形似得名西臨大江東與石頭城相接南史陳後主禎明三年隋將濟宜黃侯慧紀自荊州帥

將士沿江而下欲趨臺城遣南康太守魯肅將兵以鐵鎖橫江隋將楊素奮兵擊之爭馬鞍山四十餘戰隋軍死者五千餘人今去城十里

大巫山

圖經云在溧水縣北四十五里周回二百五十步高八丈長塘湖內接鎮江府金壇縣界

小巫山

圖經云在溧水縣東北二十五里周回四里高五丈長塘湖內石上有獸跡

平陵山

圖經云在溧水縣西北三十五里高三丈周回三里
晉書云永和三年李閔斬韓晃蘇逸于此

鐵冶山

圖經云在溧水縣西南七十里周回二十里高一百
八十丈輿地志云前代鐵冶山

絳巖山

圖經云在句容縣西南三十里周回二十四里高一
百六十五丈上有龍坑祠壇江南地志云漢丹陽縣
北有赭山其土亦赤因爲郡名本名赤山唐天寶六
年改名絳巖山

竹里山

圖經云在句容縣方輿地記云行者以其途傾險號
曰翻山峴鮑昭有行翻車峴詩卽此山也

大城山

圖經云周回二十二里高八十二丈南接符堅山西
接鴈門山北接竹堂山今去城七十里

望祭山

東晉成帝於北郊以白山鍾山配四十四神之數兼
祭之按通典梁武帝省四望座惟鍾山及松江浙江
五湖白石山並存之

白土岡

圖經云北連蔣山其土色白因名之輿地志云同夏縣西有白土塾卽此地按北史隋賀若弼嘗破陳軍於蔣山之白土岡今蔣山西北有岡壠土色正白乃其地圖經云在縣東二十二里非是蓋同夏縣在今縣東十五里而白土岡在同夏之西不應有二十二里之遠也

白楊路

圖經云縣南十二里石山岡之橫道是也六朝雜事云宋袁粲常酌于此忽逢村父便留連笑語人恠而

問之荅曰吾侶偶游非知音也楊修有詩云殘枝敗葉幾霑春莫問栽培迹已陳細雨斜風馬無力蕭蕭滿路更愁人

千佛嶺

在攝山栖霞寺之側按江摠栖霞寺碑明僧紹居士子仲璋爲臨沂令於西峯石壁與年鑄造無量壽佛大同二年龕頂放光齊文惠且文獻王竟陵文宣始安王及宋江夏王霍建像梁臨川靖惠王復加瑩飾嶺之本沈傳師徐鉉張稚圭王雱題名

謝安墩

在半山報寧寺之後基址尚存謝安與王羲之嘗登此超然有高世之志李太白將營園其上乃作詩曰晉室昔橫潰永嘉遂南奔沙塵何茫茫龍虎鬪朝昏胡馬風漢草天驕蹙中原哲匠感頽運雲屏忽飛翻組練照楚國旌旗連海門西塞百萬衆戈甲如雲屯投鞭可填江一掃不足論皇運有返正醜虜無遺魂談笑遏橫流蒼生望斯存冶城訪古跡猶有謝安墩憑覽周地險高標絕人宣想像東山姿緬懷右軍言梧桐識佳樹蕙草留芳根地古雲物在臺荒禾黍繁

我來酌清波于此樹名園功成拂衣去歸入武陵源王荆公詩云我名公字偶相同我屋公墩在眼中公去我來墩屬我不應墩姓尚隨公

桃花塢

在蔣山寶公塔之西北舊有桃花甚盛今不復存

方山埭

建康實錄吳赤烏八年使校尉陳勳發屯田兵于方山南截淮立埭號方山埭又按南史湖塾縣方山埭高峻冬月行旅以爲難齊明帝使沈瑀修之瑀乃開四洪斷行客就作三日便辦其埭今去城四十五里

雞鳴埭

建康實錄青溪有橋名募士橋橋西南過溝有埭名雞鳴埭齊武帝早遊鍾山射雉至此雞始鳴圖經云今在青溪西南潮溝之上又按南史齊武帝永明中散遊幸諸苑載宮人從車至內深隱不聞端門鼓漏聲置鍾景陽樓上應聞鍾聲並早起粧飾帝數幸琅瑯城宮人常從早發至湖北埭雞始鳴故呼爲雞鳴埭若爾其埭又當近北父老傳曰今清化市真武廟側是其處也二埭恐皆當時所歷姑兩存之

鑄劍坑

圖經云在溧陽縣南八十里石屋山之西舊經云昔吳王使歐冶子鑄劍于此

射雉場

圖經云在縣東二十里齊東昏侯置射雉場五百所皆以七寶裝翳楊修有詩曰外作禽荒內色荒三千紅粉日嚴粧潘妃縱有嫣然態不步金蓮到射場

絕地

圖經云在縣南三里古大社西有凶地三畝晉周顛司馬秀蘇峻皆宅于此悉以禍敗宋王僧綽曰大丈夫當以正道自居何宅之有凶吉尋爲元凶所害楊

修有詩曰四主衣冠今不終高門列戟謾重重由來
瘠沃分勞逸莫道人凶非宅凶
宅舍門第七

孔子巷

輿地志云孔子廟在樂遊苑東隔青溪本聖亭侯所
奉之廟也舊在溪南丹陽郡之東南本東晉所立中
廢宋元嘉十九年詔復孔子廟至齊遷于今處以舊
地爲浮圖今名孔子寺亦名孔子巷在城東南五里
古長樂橋東

言偃里

史記孔子弟子列傳言偃字子游吳人今不知其里
所在或云在城東二十二里

四學

南史宋文帝元嘉十六年立儒學館于雞籠山命雷
次宗居之因集丹陽何尚之立玄素學著作佐郎何
承天立史學司徒叅軍謝玄立文學各聚門徒多就
業者江左風俗於斯美焉

陸機宅

建康實錄云陸機入洛作懷舊居賦云望東城之紆
徐邈吾廬之延佇李太白題王處士水亭云齊朝南

苑是陸機宅其詩云王子耽玄言賢人多在門好鵝
尋道士愛竹嘯名園樹色老荒苑池光蕩華軒北堂
見明月更憶陸平原掃地青玉簾爲余置金樽醉罷
欲歸去花枝宿鳥喧何時復來此再得洗囂煩圖經
云在縣南五里秦淮之側

江令宅

陳尚書令江總宅也建康實錄及楊修詩注云南朝
鼎族多夾青溪江令宅尤占勝地後主嘗幸其宅呼
爲狎客劉禹錫詩云南朝詞臣北朝客歸來唯見秦
淮碧池臺竹樹三畝餘至今人道江家宅今城東段
大夫約之宅正臨青溪卽其地也故王荆公詩云昔
時江令宅今日段侯家此可驗也

沈約宅

南史梁沈約遷尚書令雖名位隆重而居處儉素立
宅東田矚望郊阜嘗爲郊居賦以叙其事東田在鍾
山之下也

孫瑒宅

建康實錄陳起兵部尚書孫瑒居處奢豪宅在青溪
東西卽江搃宅瑒家庭穿築極林泉之致歌童舞女
當世罕儔

劉子珪宅

南史齊劉瓛字子珪居于檀橋瓦屋數間上皆穿漏永平七年竟陵王子良表武帝爲立館帝以揚烈橋故主地給之檀橋在今縣東二十五里青龍山之前朱异宅

南史梁朱异及諸子自潮溝列宅至青溪其中有臺池玩好每暇日與賓客遊焉

諸葛恪宅

圖經云在縣東二里古元風觀前南接青溪里俗傳云在今縣東南百餘步面對青溪其東卽江今宅也

宋齊丘宅

舊傳在鎮淮橋之北御街之東今南北較務是也其後又爲南唐國子監

杜姥宅

建康實錄晉成帝恭皇后杜氏母裴氏卽杜弘治之妻也裴氏名穆孝武帝封爲廣德君初穆渡江宅於南掖門外時裴氏壽考故呼爲杜姥圖經云在舊縣東北三里舊縣在冶城今天慶觀之東是也其宅未詳所在

烏衣巷

王榭金陵人世以航海爲業一日海中失船泛一木
登岸見一翁一媪皆衣皂引榭至所居乃烏衣國也
以女妻之既久榭思歸復乘雲軒泛海至其家有二
燕棲于梁上榭以手招之卽飛來臂上取片紙書小
詩繫于燕尾曰誤到華胥國裡來玉人終日苦憐才
雲軒飄出無消息洒淚臨風幾百回來春燕又飛來
榭身上有詩云昔日相逢冥數合如今睽遠是生離
來春縱有相思字三月天南無鴈飛至今歲竟不至
因目榭所居爲烏衣巷劉禹錫有詩曰朱雀橋邊野
草花烏衣巷口夕陽斜舊時王榭堂前燕飛入尋常

百姓家

此見
撫遺

圖經云在縣東南四里晉書王導紀瞻

宅皆在此巷

乘黃署

輿地志云在東府之西北五輅及朝車凡駕馬者之
所去縣東北六里

紙官署

輿地志云宋永初中立舊日齊帝于此造銀光紙以
賜王僧虔在縣東一十五里

扶南樂署

建康實錄吳赤烏七年扶南國獻樂人于此置舍以

教宮人在縣北二里

銅螭署

臺城刻漏署西本洛陽之舊物宋平姚秦遷于此魏明帝爲太子時玩以玉手板刺螭口中因入不出後人常見白蠅涎在其中梁元帝移之江陵此物後遂不復見楊修詩云挈壺傳箭通天聰鑄出蟠螭巧範同何事腹中藏怪物人驚蠅涎氣如虹

錦署

圖經云在縣東南十里宋遷百工于此也楊修詩云人衣縑縷地衣紅不念家

織文應歲

貢更翻新樣集機工

焚衣街

齊東昏侯自製服爲四種冠五私袍一月中二十餘出辰出三更歸夜出清晨返梁自襄陽出師廢之焚奢淫服六十二種於御街中楊修詩云雉頭金縷又珠胎煙緒香雲晝不開御路傍人皆嘆息逡巡紅焰作青灰

識記門第八

秦淮石誌

保大中浚秦淮得石誌按其刻有大宋乾德四年凡

六字他字磨滅不可識令諸儒參驗乃輔公祐反江東時年號太祖受命國號宋改元乾德江左始衰弱豈非威令將及而符讖先著也

石印

天璽元年歷陽山石文理成字凡二十二云楚九州渚吳九州都揚州士作天子四世治太平始江表傳云歷陽縣有石山臨水高百丈其三丈所有七穿駢羅穿中色黃赤不與本體相似俗相傳謂之石印又云石印封發天下當太平下有祠屋巫祝言石印神有三郎時歷陽長表上言石印發皓遣使以太牢祭

歷山巫言石印卽三郎說天下方太平使者作高梯上看印文詐以朱書石作二十字還以啓皓皓大喜曰吳當爲九州作都渚乎從大皇帝逮孤四世矣太平之主非孤復誰重遣使以印綬拜三郎爲王又刻石立銘褒讚靈德以荅休祥此見吳志注

石室

吳興陽羨山有空石長十餘丈名曰石室在所表爲大瑞皓乃遣司徒董朝太常周處至陽羨縣封禪國山明年改元天紀大赦以協石文

三斷石

吳後主天冊元年掘地得銀長一尺廣三分刻上有年月字又於吳郡臨平湖邊得一石石中有一小石青白色長四寸廣二寸刻上作皇帝字于是改元天璽遂立石紀吳功德按實錄云縣南三十里西接牛頭山丹陽雲巖東路有大碣石長二丈折爲三斷此紀功之碑也今移在府治中可辨者二百餘字漫滅者五十餘字楊修詩曰孫吳紀德舊刊碑埋沒蟠螭與伏龜惆悵石岡三斷在至今猶似鼎分時

寶公銅牌記

按高僧傳公諱寶誌宋元嘉中現形于東陽鎮古木

鷹巢中朱氏聞巢中兒啼遂收育之因以朱爲姓施宅爲寺公自少出家依於鍾山道林有銅牌記多識未來事云有一真人在冀州開口張弓在左邊子子孫孫萬萬年江南中主名其子曰弘冀吳越錢鏐諸子亦皆連弘字以應之而國朝宣祖諱乃正當之

潛鶴鼓

臺城端門上二鼓初得于會稽雷門傳是越王舊物擊之聲聞洛陽後孫恩亂兵擊破中有二鶴冲天而去自是不復鳴後人呼爲潛鶴鼓楊修有詩云端門擊破使人驚潛鶴雙飛上玉清怪得舊時聲太遠冲

天合自九臯鳴

天水碧

南唐末時前數年宮人按薔薇水染生帛一夕忘收爲濃露所漬色倍鮮翠因令染坊染必經宿露之號爲天水碧宮中競服之識者以爲天水趙之望也

獨足臺

陳末時有一鳥獨足飛上宮城臺上以觜畫地云獨足上高臺盛草化爲灰欲知我家處朱門當水開解者以爲獨足指後主獨行無衆盛草言荒穢隋承火運草得火而灰及國破隋煬帝館于都水臺所謂上

高臺當水開也楊修詩云鳥跡分明在帝臺管絃聲裡輒書來回頭一覺風流夢猶得朱門傍水開

靈異門第九

八功德水

蔣山悟真菴後按梅摯亭記梁天監中有胡僧曇隱寓錫于此山中乏水時有龐眉叟相謂曰予山龍也知師渴飲措之無難俄而一沼沸成後有西僧繼至云本域八池已失其一似竭彼盈此也其泉一清二冷一香四柔五甘六淨七不饑八蠲疴故名八功德水自梁已前嘗取給御厨又按楊修詩注云高僧曇

隱遊行于此忽聞金石絲竹之音俄見清泉一泓瑩
徹甘滑有積年疾者飲之皆愈

誌公鱠殘魚

高僧傳寶誌嘗對梁武帝食鱠帝曰朕不知味二十
餘年師何爲爾誌乃吐出小魚鱗尾依然今金陵尚
有鱠殘魚

牝狙觸網

按湘山野錄云南唐李後主獵青龍山一牝狙觸網
見主雨淚稽顙屈指其腹主戒虞人保守之是夕誕
二子還幸大理寺親錄囚繫一大辟婦以孕在獄未

幾誕二子煜感化狙之事罪止于流其山去城東二
十五里

感龍產鯉

昔民有女感黑龍于田野歸而有娠後產鯉魚投于
水中復能變化隨母所出入後成龍而去母亡每春
時必來墳所鄉人懼之因立廟祠焉謂之烏鯉廟在
溧水縣東南二十五里

郝氏化蛇

郝氏梁武帝皇后也崩數月帝常追悼之晝則忽忽
不樂宵乃耿耿不寐居寢殿聞外騷宰

蘇骨切勃宰
穴中出也

聲視之乃見一鱗盤躡上殿

式冉切說文云暫視貌

睛呀牙

口切張貌

而起謂蛇曰朕官殿嚴警非爾蛇類所生之處必其

妖孽欲崇朕邪蛇為人語啓帝曰鱗則晉之郗氏也

妾以生存嫉妬六宮其性慘毒怒一發則火熾矢射

射物害人死以是罪謫爲鱗耳無飲食可實口無窟

穴可庇身飢窘困迫力不自勝又鱗甲有蟲咬子合切

變化而至不以皇居深重爲阻耳感帝平昔眷妾之厚故託醜形骸陳露于帝祈一功德以見拯拔也帝

聞之嗚呼感激旣而求鱗遂不復見帝明日大集少

門於殿庭宣其由問善之最以贖其苦誌公對曰非

禮佛懺滌悃歎不可帝乃然其言搜索佛經錄其名

號兼親杼睿思灑聖翰撰悔文共成十卷皆採撫佛

語削去閑詞爲其懺禮又一日聞官室內異香馥郁

良久轉美初不知所來帝因仰視乃見一天人容儀

端麗謂帝曰此則鱗後身也蒙帝功德已得生忉利

今呈本身以爲明驗也慇懃致謝言訖而去此見梁

武懺序

燕雀湖

輿地志云走馬橋見有燕雀湖窮神秘苑曰梁昭明太子在東宮有一琉璃盃紫玉杯皆武帝所賜也旣薨詔置梓宮後更塋開墳爲闔人攜入大航乃有燕雀數萬擊之因爲有司所縛乃獲二寶器帝聞而驚異詔以賜太孫封墳之際復有燕雀數萬銜土以增其上墳側今有湖後人因名燕雀湖楊修有詩曰平湖岸側見高墳萬土銜來燕雀羣鑑面無波天一色此中文藻似儲君在城東四里下入青溪

新洲

南史宋武帝伐荻新洲見大蛇長數丈射之明日復

至洲裡聞有杵臼聲往覘之童子數人皆新衣于榛中擣藥問其故荅曰王爲劉寄奴所射合散傳之帝曰王神何不殺之荅曰寄奴王者不可殺帝叱之皆散收藥而反今薛家洲蓋其地也屬金陵鄉去城北四十里

生人葎

南史梁阮孝緒字士宗母王氏有疾合藥須得生人葎舊傳鍾山所出孝緒躬歷幽險累日不逢忽一鹿前行隨後至一所遂滅就視其處果獲此草今山中不復有之

木醴

建康實錄陳後主禎明二年初覆舟山及松栢林冬
月出木醴後主以為甘露之瑞俗呼為雀餉今廢也
神仙門第十

茅君山

茅濛字初成華陽人也隱華山修道秦始皇三十一
年白日上昇是時先有民謠曰神仙得者茅初成駕
龍上昇入太清時下玄洲戲赤城繼世而往在我盈
始皇聞之問故老曰此仙謠也於是有尋仙之意濛
之元孫盈得道于金陵句曲山上昇為東嶽上卿司

命真君太元真人居赤城時來句曲邦人改句曲為

茅君山

事見
撫遺

圖經云漢時有三茅君各乘一白鶴來

居其上故號為三茅君世傳茅盈茅固茅震皆濛之

後也山在句容縣東南四十五里

華山華陽縣
皆在句容縣

荆公

有詩云一峯高出眾山巔疑隔塵沙道里千俯視煙
雲來不極仰攀蘿葛去無前人間已換嘉平帝地下
誰通句曲天陳迹是非分草莽紛紛流俗尚師仙

仙人臺

幕府山之西有石碁盤說者云舊有仙人對奕于此
故徐君平幕府山詩云仙去碁枰草自繁即此地也

去城北二十五里

尋仙觀

梁時造也與芝山鷲洞相鄰上有石壇舊經云昔茅君行道之所唐垂拱五年道士宋文幹因石琢像董修壇焉在溧水縣東南六十里

太虛觀

舊經云東晉時李盤白遇仙於此修道白日上昇山頂有會仙亭唐開元五年建大中祥符元年九月奉敕改今額在溧陽縣西南四十里盤白山下初名招仙觀

華陽洞

舊經云卽第八金壇大洞天也唐改爲太平觀在句容縣東南四十里茅山之側

華陽宮

舊經云張真人煉丹之所也梁朝陶隱居立爲華陽上館唐天寶七年改今額

鷲洞宮

舊經云梁普通三年晉陵縣女子錢妙真幼年于此修行誦黃庭經積功三十年道成佩白練飛入洞中有石室醮壇存焉天寶七年奉敕于錢真人昇仙之

所建宮度女道士洞在宮東一百餘步

太平觀

梁書云陶弘景讀書萬餘卷善琴碁爲諸王侍讀永明十年脫朝服掛神武門上表辭祿詔許之於是止于句容之句曲山曰此是第八洞宮之名金壇華陽之天乃立館自號華陽陶隱居唐正觀九年爲昇真先生改爲太平觀

青元觀

舊經云本吳朝葛仙公宅也梁天監七年建有一丹井在祠宇前去句容縣西南三百餘步

洞元觀

輿地志云赤烏二年吳大帝爲仙公葛玄造玄後白日上昇山上至今猶有壇宇楊修有詩曰葛玄功行滿三千白日驂鸞上碧天留得舊時壇宇在後人方信有神仙觀在方山下去城四十五里

仙台山

舊經云絕頂有杏林及仙人腳跡因以名之又有仙壇石井故一名仙壇石山唐垂拱五年重修壇三所并石井聖曆二年縣令岑仲琢石爲像設香燈供祀之下有清泉流入丹陽湖在溧水縣東南四十二里

白都山

昔白仲都常於此學道白日上昇因以爲名楊修詩云駕鶴騶鸞自古聞策名仙籍是真君天邊舊迹無尋處滿目青山空白雲在城南八里西臨大江

石城洞

石頭城西嶺下南臨大江有洞宛然按真語云此小有洞之南門也

道士塢

蔣山明慶寺前乃陳宣帝禮元靖先生臧兢處今在寶公塔之東

靜壇

舊經云宋侍中周捨立與道士塢相對帝問曰其壇如何對曰風不鳴條雲無膚寸鹿巾黃帔其數甚多白簡朱衣其來罕至因名曰靜壇今按道士塢在蔣山古明慶寺前與八功德水相近則靜壇當在其處

春磧

鍾山宋興寺東梁處士劉許字彥度隱居之所楊修詩云手拖葛屨坐藜牀竹樹蕭然一水傍枕上白雲船下月卜鄰東磧勝東岡

玉晨觀

句容縣東南四十五里句曲洞北門之側舊經本晉許長史宅也昔高辛時展上公秦時巴陵侯後漢時杜廣平並於此學道得仙梁武帝天監十三年陶弘景奏請立爲朱陽館唐正觀中爲紫微國師王先生改爲華陽宮天寶七年爲玄靖先生改紫陽觀前有郭真人養龍池醮壇丹井俱在大中祥符中奉勅改今額

寺院門第十一

吳建初寺

輿地志云吳赤烏十年沙門僧會自西竺來傳佛法

吳太帝作寺自此起楊修有詩曰僧會西來始布金
常聞鐘磬伴潮音江南古寺知多少此寺獨應年最
深舊傳在城南二百餘步

同泰寺

梁武帝改年號大同起同泰寺在臺城內窮竭帑藏
造大佛閣七層爲火所焚梁帝捨身施財以祈佛福
自大通以後無年不幸同泰寺設四部無遮大會俄
而侯景兵起陷城遂以虛器進膳自庚辰至丙戌七
日不食而崩楊修詩曰佛事莊嚴國力疲照天金碧
倚欄危沈檀爐上煙雲合恰似當年煨燼時



蔣山太平興國禪寺

梁武帝天監十三年以錢二十萬易定林寺前岡獨龍阜以葬誌公永定公主以湯沐之資造浮圖五級於其上十四年卽塔前建開善寺今寺卽其地也唐乾符中改爲寶公院南唐昇元中徐德裕重修開寶三年後主改爲開善道場太平興國五年改賜今額慶曆二年府尹葉龍圖清臣奏請爲十方禪院據高僧傳及寶公實錄公諱實誌宋元嘉中現於東陽郡古木鷹巢中朱氏婦聞巢中兒啼遂收育之因以朱爲姓乃施宅爲寺焉公自少出家依于鍾山道林寺

常持一錫杖杖懸刀尺及鏡佛之類由是知名齊梁間死而將葬梁武帝命陸倕製銘葬已賜玻璃珠以飾塔表南唐保大七年加號妙覺塔名應世本朝太平興國七年舒民柯萼遇老僧往萬歲山指古松下掘之得石篆乃寶公記聖祚綿遠之文於是遣使致謝謚曰寶公妙覺治平初更謚道林真覺大師按建康實錄開善寺有誌公履唐神龍初鄭克俊取之以歸長安今洗鉢池尚在塔西二里法雲寺基方池是也寺西有曰道光泉以僧道光穿斲竹足切得名曰宋熙泉以近宋熙寺基之側有八功德水在寺東悟

真菴之後一云泉在寺北高峯絕頂寺東山巔有定
心石下臨峭壁寺西百餘步有白蓮菴菴前有白蓮
池乃策禪師退居之所寺後向東有塔曰婁約卽慧
約婁禪師之塔高僧傳曰墓于獨龍山寶公之左是
也舊有寶公及婁約塔碑梁王筠撰文今不復存楊
次田詩曰今古忙忙利祿間幾人能此叩松關猿驚
鶴怨不知處處虎踞龍盤空見山芳草路隨流水遠老
僧心共白雲閑淮南舊隱拋離久一誦移文一愧顏
荆公詩已見鍾阜下

半山報寧禪寺

王荆公故宅也其地名白塘舊以地卑積水爲患自
荆公卜居乃鑿渠決水以通城河元豐七年公以病
聞神廟遣國醫珍視旣愈乃請以宅爲寺因賜額報
寧禪寺寺後有謝安墩其西有土山曰培塿乃荆公
決渠積土之地由城東門至蔣山此半道也故今亦
名半山寺陳軒金陵集載荆公半山詩凡十五首寺
中有寶禪師語錄序王旂撰米芾書

清涼廣惠禪寺

僞吳順義中徐溫建爲興教寺南唐昇元初改石頭
清涼禪寺後主復改清涼大道場本朝太平興國五

年閏三月改爲今額舊傳嘗爲李氏避暑宮寺中有
德慶堂今法堂前舊基是也後主嘗留宿寺中故其
詩有未能歸去宿龍宮之句德慶堂名乃後主親書
祭悟空禪師乃後主自爲文碑刻今見在舊有李氏
宮人親寫藏經及本朝所賜御書今皆不存唐溫庭
筠清涼寺詩曰詩閣小窓藏雪嶺禪堂秋水接藍溪
東坡先生捨彌陀畫像于寺中其詩曰問禪不契前
三語施佛空留丈六身蓋謂此也楊次公題清涼寺
翠微亭詩曰君勿愛清涼清涼如火如沸湯君勿惡
炎熱炎熱如冰如積雪勿愛亦勿惡未是逍遙處君

不見海會山前一條路一車來一車去今古轉轅何
日住落花時節雨初晴黃鶯枝上分明語又因舟次
秦淮寄清涼老曰雲居一衆舟次秦淮忽爾狂風動
地白浪滔天致此片帆難以寸進又恐是石頭老子
把定要津不肯放過今者食時已及香積未充更不
敢遣化菩薩去午煩若是靈利人必已會得了也時
王荆公在清涼寺見之云清涼應是推辭不得

昇元寺

亦名瓦棺寺

昇元寺卽瓦棺寺也在城西隅瞰江面後踞崇岡最
爲古跡累經兵火畧無彷彿李王時昇元閣猶在乃

梁朝故物高二百四十尺太白詩所謂日月隱檐楹

是也此見雜說今西南隅戒壇乃是故基南唐將歸我宋

數年前昇元寺殿基掘得石記乃詩識其辭曰若問

江南事江南事不憑抱雞昇寶位謂李煜丁酉年生也走犬出

金陵謂王師甲戌渡江也子建居南極曹彬列柵城南乃子建也安仁秉夜

燈謂潘美恐有伏兵命縱火也東陵驕小女騎虎渡河冰錢徽以戊寅年

入朝盡獻浙西之地騎虎之謂也寺之名起自西晉長興年中長沙

城阿陸地生青蓮兩朶民間聞之官司掘得一瓦棺

開見一僧形貌儼然其花從舌根頂顱生出詢及父

老曰昔有一僧不說姓名平生誦法華經萬餘部臨

歿遺言曰以瓦棺葬之此地所司具奏朝廷乃賜建

蓮花寺五代兵火焚之李太白登瓦棺閣極眺金陵

城云鍾山對北戶淮水入南營漫漫雨花落嘈嘈天

樂鳴兩廊振法鼓四角吟風箏香出霄漢上仰攀日

月行山空霸氣滅地古寒陰生寥廓雲漢晚蒼茫宮

觀平門餘閭闔寺樓識鳳凰名雷作北山動神扶萬

拱傾靈光何足貴長此鎮吾京

大愛敬寺

梁武帝普通元年造在蔣山之北高峯上唐乾符間

重修廣明元年改爲廣明愛敬禪院南唐改廣孝禪

院本朝開寶七年移額入城中今壽寧寺是也李建
勳愛敬寺詩其畧云雲散經窓濕山晴石路香

法寶寺

亦名臺城寺

梁同泰寺基之半也建康實錄梁武帝大通元年創

同泰寺寺處宮後別開一門名大通門

對寺之南門取返語以協

同泰爲名也

帝晨夕講議多遊此門僞吳順義二年置爲

臺城千福院本朝改賜今額寺前有醜石四各高丈
餘俗呼爲三品石政和間取歸京師其寺今在城北

法光寺

今名鹿苑寺

卽梁之蕭帝寺舊傳天監十三年造元絳寺記云不

知從昔之名故後人以帝氏目之南唐保大間重建
後主易名曰法光寺有子隱堂郝氏窟今隸祥鸞坊
本朝敕改鹿苑寺

棲霞禪寺

攝山齊明僧紹故宅也按棲霞寺江摠碑云齊居士
平原明僧紹宋泰始中遊此山乃刊木結茅二十許
年有法度禪師與僧紹甚善僧紹遂捨宅成此寺蓋
齊永明七年正月三日也唐高宗嘗建寺碑拜書寺
額武宗會昌中廢宣宗大中五年重建本朝太平興
國五年改爲普雲寺景德五年改賜景德棲霞禪寺

寺有舍利塔乃隋文帝葬舍利處南唐高越林仁肇
建塔徐鉉書額曰妙因寺左有千佛嶺乃明僧紹子
仲璋創造齊文惠太子同僧琢梁臨川靖惠王采飾
寺後有天開巖碧蘚亭白雲菴迎賢石醒石中峯澗
石房白雲泉亦名品外泉寺前有明僧紹高越墓菩
提王廟菩提王卽攝山靳神也廟舊居山前今移置
寺右仁廟朝嘗賜金寶方牌熙寧間取寄華藏寺中
石佛額有玻瓈珠後墜地因置閣盛之大觀中爲權
要取去米芾嘗作詩紀其事寺今有唐高宗陳尚書
令江搃碑沈傳師齊疏及沈傳師徐鉉題名按陳軒
金陵集劉長卿顧况李紳皮日休韓熙載徐鉉徐鍇
柳琰權德輿皆有詩德輿詩其畧云縈紆松路深繚
繞雲山曲重樓回木杪古像鑿巖腹皆山中景也今
去城四十五里

祈澤寺

寺記云宋少帝景平元年建去府城二十里梁朝置
龍堂有初法師者來結茅菴於山下日夜誦法華經
有一女郎來聽移時方去師訝之因問其任止女曰
兒東海龍女遊江淮間聞師誦經來聽之師曰此山
乏水汝能神變爲我開一泉可乎女曰此固易事容

兒歸白父言訖不見數日後忽作風雷良久有清泉涌于座中南唐保大中以久旱祈雨于舊寺基信宿而雨作自後以爲祈禱之所本朝治平改賜祈澤治平寺許堅嘗有二詩其後王荆公題云高人遺跡空佳句誰識旌陽後世孫

鐵索寺

本東晉尼寺也尚書仲杲女見釋書有比丘尼問講師師曰女子削髮出家爲比丘尼後因鐵索羅國尼至遂就此建寺尼以鐵索羅爲名中國尼自此始

明慶寺

蔣山上明慶寺後別有小嶺碧石青林幽邃如畫世人呼爲屏風嶺有高僧隱于此忽聞絲竹之音俄而有清泉一派瑩徹甘滑有積年疾者服之愈梁已前嘗取給御厨水俗呼爲八功德水楊修有詩云翠壁如屏旱不枯一泓甘滑飲醍醐高僧到此聞絲竹還有金鱗對躍無

佛窟寺

城南二十里牛頭山下有深坑言是辟支佛窟寺記本沙門道慶禪房梁天監中司空徐慶造寺因名曰佛窟楊修有詩云曩事何人爲證明白雲深鎖翠微

坑已闢過去辟支佛未見當來彌勒生

普濟寺

梁頭陀寺也建康實錄梁武帝大同元年置頭陀寺記舍人石興造寺在蔣山頂第一峯後移置山下本朝治平中改賜今額殿後有應潮井其水與江潮相應及有梁昭明太子讀書臺在其西卽普通元年所置大愛敬寺基也

淨妙寺

舊名齊安寺

南唐昇元中建額曰齊安本朝政和五年正月改賜淨妙舊臨官路今移置高隴面秦淮王荆公齊安寺

詩刻云日靜山如染風暄草欲薰梅殘數點雪麥漲一溪雲去城四里

寶林寺

舊經云本同行寺梁天監中武帝與寶公同遊此山見林巒殊勝命建精藍因以同行爲額亦名聖遊寺唐會昌中廢僞吳太和中復建後改爲秀峯院南唐保大九年重修本朝嘉祐中改賜今額有琪樹在法堂前梅摯詩其畧云影借金田潤香隨壁月流遠疑元帝植近想誌公遊建炎間樹爲兵火所焚今寺屬

寶林山

寶乘院

亦名草堂

齊草堂寺也寺乃齊周顒隱居之所顒後出仕孔稚圭作北山移文以譏之高僧傳云時有釋慧約姓婁少達妙理顒素所欽服乃于鍾山舊館造草堂寺以居之今寺左乃婁約置臺講經文之地寺後卽顒舊居也王荆公草堂寺詩云周顒宅作阿蘭若婁約身歸窄堵坡唐會昌中寺廢本朝復建治平間改賜今額隸鍾山鄉去城十一里

聖湯延祥寺

隸湯山下舊有湯泉十所今存者六唐德宗時韓晉公滉爲淞江觀察使滉小女有惡疾浴於湯應時而愈乃以女妝奩建精舍于湯山之右且求僧以主寺事時得竹林寺一市蠱毒藥僧遠近賴之多獲全濟故其藥至今以溫湯爲名按唐書滉觀察淞江在貞元以前寺之建當在建中興元間而圖經乃云咸通十二年韓公置精刹咸通蓋懿宗年號是時晉公已亡也

景德寺

僞吳始名崇孝寺本朝景德中改賜今額建炎元年以其地改克太廟今隸嘉瑞坊

長干寺

今名天禧寺

丹陽記大長干寺道西有張子布宅在淮水南對瓦棺寺南張侯橋也長干是秣陵縣東里巷名江東謂山隴之間曰干建康南五里有山岡其間平地庶民雜居有大長干小長干東長干並是地名小長干在瓦棺寺南巷西頭出大江梁初起長干寺按塔記在秣陵縣東今天禧寺乃大長干也

昔有并州胡陸訶死經七日更生云

見觀音教曰洛下丹陽會稽有阿育王塔可悉禮拜之

荆公有詩云梵館清閑

側布金小塘回曲翠文深柳條不似千絲直荷葉相依萬蓋陰淡淡岑雲相上下翩翩沙鳥自浮沈羈人樂此忘歸意忍向西風學舊吟

能仁寺

南唐古寺基也保大年中昇州特進守司徒致仕鍾山公李建勳嘗捨莊田入寺後廢本朝撥賜地基起興慈禪院咸平初李建勳女潤州本起寺住持臨壇精律大德尼進暉申明乞以故父李相公舊所施莊田入興慈寺至今供常住也咸平後改承天寺崇寧間又改天下承天爲能仁寺真宗皇帝賜昇州法主圓覺大師賜紫德明七言二韻詩一首詩曰精勤演律達真風釋子南禪道少同

南中多長老禪僧

奧旨筌蹄悟

佛理慧燈廣布九圍中

真蹟今藏本寺

廟宇門第十二

吳大帝廟

隸府城西門外今廟庭卽當時舊宮唐大中初邑人
台州永寧簿周知業以家貲重修建炎間兵火廢毀
其地在石頭城清涼寺之西今去府七里楊修有詩
云古木陰森廟巋然龍蟠虎踞舊山川當時鼎足一
場夢空裡旋風飛紙錢

蔣帝廟

帝卽後漢秣陵尉蔣子文金陵圖經云漢末子文爲

秣陵尉逐盜鍾山傷額而歿嘗自謂骨青死當爲神
及吳大帝遷都建鄴子文乘白馬執白羽扇見形故
吏白吳帝爲立廟不爾百姓大疫權猶未信翼日復
見于路云當今飛蠱入人耳後如其言帝乃立廟于
鍾山封子文爲蔣侯權避祖諱因改鍾山曰蔣山晉
蘇峻之難鍾山神同蔣侯爲助且曰蘇峻爲逆當共
誅鋤之後果斬峻按杜祐通典宋高帝永初二年普
禁淫祀自蔣子文祠以下皆絕孝建初修復加蔣侯
爵位至相國大都督中外諸軍事明帝初四方兵起
求救於神遂封爲蔣王齊永明中崔慧景之難迎神

還臺以求福助事平授以帝位又按南史梁武帝天監六年旱甚詔祈蔣神求雨十旬不降帝命載荻焚其廟當神上俄有雲如繖倏忽驟雨如瀉臺中宮殿振動帝懼馳詔追停少時乃靜自此帝益畏信是時魏軍圍鍾離蔣帝神報敕必許扶助旣而無雨水長遂挫敵人凱旋之後廟中人馬脚盡泥濕當時目覩焉齊旣封以帝號於是以廟門爲靈光之門中門爲興善之門外殿曰帝山內殿曰神居西閣有佛殿名靈鷲東閣卽子文所居也南唐追謚曰莊武帝更修廟宇開寶八年焚毀雍熙四年邑人張革于舊基重建景祐二年知府陳待制執中復增修之朝廷賜廟額曰惠烈政和八年本縣復加修飾有南唐及景祐政和廟記可攷今隸蔣山之北去城二十里

晉元帝廟

舊在下將軍廟側今移在嘉瑞坊城隍廟之左

武烈帝廟

舊經云隋司徒陳杲仁有戰功唐封忠烈公僞冊武烈帝本廟在江夏

楚平王廟

吳越春秋云楚平王都于固城廟今在溧水縣南九

十里昔周成王封熊繹子男之田于蠻荆之地至莊
王時賜姓爲芊音救楚姓氏至靈王立與敵曰尋干戈邊
鄙不寧時吳軍失利乃陷瀨渚至平王用佞臣之言
殺太傅伍奢并其子尚子胥奔吳吳用之破楚而入
郢此廟卽平王之舊址也唐廣明元年重修

晉謝將軍廟

卽晉謝玄也咸通九年置開寶四年重修在府城西
南三里

晉卞忠正廟

晉尚書令贈侍中驃騎將軍卞壺諡忠正蘇峻之亂

與其二子力戰死之葬吳冶城今天慶觀乃其地也
後七十餘年盜發其墓尸僵如生鬚髮蒼然爪甲穿
手背安帝賜錢十萬封之入梁復毀武帝又加修治
李氏有江南建中正亭于其墓穿地得斷碑公名存
焉徐錯實爲之識本朝慶曆中知府事龍圖閣直學
士葉公清臣又封墓刻石表之改亭名曰忠孝取其
母之言曰父爲忠臣子爲孝子也又五十年左丞葉
公夢得來守是邦卽亭爲堂圖公像列之常祀春秋
祠焉乃爲之記

晉陰山廟

在縣南向西十二里舊經云建武中丞相王導於岡阜間隱約見數十步騎駐立于壠上導怪之使人致問俄失其所夜見夢于導曰我乃陰山神也昨隨帝渡江寓泊于晨見之所鄉爲我置祠當福晉祚導乃以其事聞上置廟于此仍名其岡爲陰山楊修詩曰爐香煙斷暮雲凝陰德山高衆所稱開府琅邪舊蒙福龍飛一馬至中興

梁祈澤夫人廟

梁置今隸祈澤寺之側舊經云有初法師者嘗講法華經于山中有女郎來聽初問之荅曰兒東海龍王

女也師告以山中乏水後數日忽聞風雨暴作向曉有泉出于座下後遂爲水旱祈禱之所因號祈澤夫人紹興元年旱禱有應本府狀其事于朝且言已有祈澤夫人之號因賜廟額曰嘉惠今去城二十三里

青溪夫人廟

按輿地志青溪岸側有神祠世謂青溪姑南朝甚有靈驗嘗見形于人祠今與上水閘相近說者云隋平陳斬張麗華孔貴妃於青溪柵下今祠像有三婦人乃青溪姑與二妃也

潘真君廟

舊經云昔潘氏兄弟三人於此山中得道化白鶴冲天後人思而立廟在溧陽縣東南六十里三鶴山下茅君白鶴廟

茅山白鶴廟記云此廟卽祠三茅君之所也霓旌屢降鶴駕時逢茅君分理于赤城玉洞每年以十二月二日駕白鶴于此會諸真君故名焉在句容縣東南三里

荆將軍廟

舊經荆軻廟也烈士傳曰昔左伯桃羊角哀往楚併糧于梁山左伯桃死而角哀達乃厚葬伯桃于梁山

下一夕角哀夢伯桃告曰幸感所葬奈何與荆將軍墓相鄰每地下與吾戰爲之困迫今年九月十五日將大戰至時望子借兵馬于冢上叫噪相助角哀覺而悲之如期而往曰今在冢上安知我友地下之勝負乃命開棺自刎而死報併糧之義也廟在溧水縣南四十五里

茅司徒廟

按稽神錄云浙西僧德林少時遊舒州路見一夫荷鋤治方丈之地左右數十里不見居人問之對曰頃時自舒之桐城至此暴爲疝疾不能去因臥草中及

稍醒已昏矣四望無人惟虎豹吼叫自分必死俄有一人部從如大將至此下馬良久召二卒曰善守此人明日送到桐城縣下遂上馬去倏忽不見惟二卒在焉某卽強起問之荅曰此茅將軍也常夜出獵虎憂汝被傷故使護汝更欲問卽日已出矣不復見二人卽起而行意甚輕健至桐城頃之疾愈以所見處立祠祀之德林止舒州十年及迴則村落皆立茅將軍廟今俗呼茅司徒在溧陽縣東門外一里

菩提王廟

神卽楚大夫靳尚也今在攝山按神錄楚靳神居臨沂縣舊經云齊永明初有法度禪師講經于攝山嘗患山路磽确僧徒疲於往來神爲平治之法度因爲受菩提戒立祠于彼故世號菩提江摠棲霞寺碑云梁大同元年二月神又見形著菩提巾披袈裟容止甚都來入禪堂請士衆說法廟舊在山前今移置棲霞寺門之右

二判官廟

舊經云本延祚院土地神唐會昌中寺廢景福二年神託夢于里人曰我二判官也久爲延祚寺伽藍今已遷次于寺外可爲我置祠當福於爾旣而夜見火

光連天人卽潛于光所窺見炬篲熒熒焉因就其地
建廟祀之在府西門裡

楚靳尚廟

攝山記云楚靳尚以讒殺屈原爲天所譴作一大蟒
穴在山後人爲之立廟楊修有詩云汨羅魚腹葬靈
均競渡如飛不救人天意明知讒口毒果遭天譴作
蛇身

五龍堂

府城西門外古太一觀基也南唐保大八年改爲舞
雩祠十三年有玄光尊像乘一木自江中流汎及岸

而止道衆迎接入堂供事之徐鍇嘗作記述其事

興德王廟

僞吳天祚二年李先王昇夢中見其神因立廟祀今
廢其地在鍾山蔣帝廟之北去城十三里

炳靈公廟

僞唐昇元中置按五代史後唐長興四年封東嶽三
郎爲威雄將軍大中祥符元年奉敕封炳靈公廟在
府城新橋之西

張僕射廟

舊經云唐天祐中有清河張司徒者營建金陵百姓

懷而祠之今呼張僕射廟廟之北相去四里有南唐張懿公墓道或云僕射卽懿公也名君詠字德之嘗爲特進太子太傅初不曾任司徒其說未詳今在府城西門外十里墳陵門第十三

吳大帝陵

吳志神鳳元年大帝崩葬蔣陵按樂史寰宇記在縣東北蔣山八里丹陽記云蔣陵因山爲名輿地志曰九日臺當孫陵曲折之傍故名蔣陵亭蘇峻之亂王師敗績于西陵卽此地也今蔣廟相對向西有曰孫

陵岡是爲蔣陵

吳步夫人陵

吳志赤烏元年追拜夫人步氏爲皇后後合葬蔣陵今蔣廟西南有孫陵岡上有步夫人墩墩之側有夫人塚乃其地也

吳宣明太子墳

吳志孫權皇太子登諡宣明太子初葬句容後三年移葬鍾山西蔣陵

吳甘寧墓

伏滔記吳將甘寧墓在直瀆之下俗云墓有王氣孫

皓惡之鑿其後爲直瀆温庭筠過吳主陵詩其畧云
虛聞直瀆三十里青蓋何曾到洛陽蓋譏之也

吳葛仙公墓

吳太極左仙翁葛玄墓在句容縣西南一里郡國志
云句曲有葛玄冢

晉元帝陵

建康實錄晉元帝永昌元年春葬建平陵在雞籠山
之陽不起墳

晉明帝陵

建康實錄成帝大寧二年葬武平陵在雞籠山之陽

不起墳

晉成帝陵

建康實錄晉成帝咸康八年葬興平陵在雞籠山之
陽與元帝同處不起墳

晉康帝陵

建康實錄晉康帝建元三年葬崇平陵隸鍾山之陽
不起墳

晉穆帝陵

建康實錄晉穆帝昇平五年葬永平陵隸幕府山之
陽起墳今幕府山前近西里俗相傳有穆天子墳即

其地也

晉哀帝陵

建康實錄晉哀帝興寧三年葬安平陵隸雞籠山之陽不起墳

晉簡文帝墳

建康實錄晉簡文帝咸安二年葬高平陵在鍾山之陽不起墳

晉孝武帝墳

建康實錄晉孝武帝太元二十一年葬隆平陵在鍾山之陽不起墳

晉安帝陵

建康實錄晉安帝義熙十四年崩明年葬休平陵在鍾山之陽不起墳

晉恭帝陵

建康實錄晉恭帝元熙二年葬沖平陵在鍾山之陽安帝同處不起墳○按東晉十一帝元明成哀四陵在雞籠山之陽簡文武安恭五陵在鍾山之陽並不

起墳今不復可辨惟穆帝一陵在幕府山起墳

晉山簡墓

建康實錄晉永嘉六年征南將軍荊州刺史山簡卒

歸葬建康真武湖南覆舟山之陽輿地志云山簡墓
在樂遊苑內

晉溫嶠墓

建康實錄晉溫嶠初葬豫章朝廷追思之乃爲造大
墓遷葬元明陵北幕府山之陽按晉書嶠拜驃騎將
軍開府儀同三司散騎常侍封始安郡公初葬豫章
後朝廷追嶠勲德將爲造大墓於元明二帝陵之北
陶侃上表願停移葬詔從之其後嶠妻何氏卒子放
之便載喪還詔葬建平陵北卽是嶠妻何氏墓非嶠
墓也

晉郭璞墓

真武湖中有大墩里俗相傳曰郭璞墓按晉王敦加
荊州牧敦將舉兵使璞筮璞曰無成敦怒收璞斬之
當時或歸葬于此

晉竺使君墓

隸金陵鄉張陣湖墓前有二碑以晉書參考之乃寧
朔將軍竺瑶嘗爲桓溫部將太和五年破袁瑾于弋
丘

宋武帝陵

建康實錄宋高祖永初三年葬初寧陵隸丹陽建康

縣蔣山圖經云在縣東北二十里政和間有人於蔣廟側得一石柱題云初寧陵西北隅以此考之其墳當去蔣廟不遠

宋文帝陵

建康實錄宋文帝元嘉三十年葬長寧陵圖經云隸縣東北二十五里與武帝陵相近今未詳所在

宋文帝元后陵

南史宋元嘉十七年葬先皇后袁氏于長寧陵長寧卽文帝陵也

宋明宣沈太后陵

南史宋明宣沈太后爲文帝美人生明帝元嘉三十年葬建康之幕府山今寶林寺西南有墳壠相傳爲國婆墳疑卽沈后所葬之地

宋明帝陵

建康實錄宋明帝泰豫元年葬高寧陵隸臨沂縣幕府山西與王導墳相近今山前有墳壠晉穆帝陵在山南或以西爲明帝之墓

大司徒甄邯墓

圖經云在縣北七里後湖之側按南史宋張永嘗開真武湖遇古冢冢上得一銅斗有柄文帝以訪朝士

何承天曰此斗王莽三公亡皆賜之一在冢外一在冢內時三台居江左者惟甄邯此必邯之墓及啟冢又得一斗復有一石銘云大司徒甄邯之墓今未詳所在

宋謝濤墓

按土山淨名寺新得古碑云宋散騎常侍謝濤元嘉十七年葬于揚州丹陽郡建康縣東鄉土山里

宋謝濤夫人王氏墓

夫人琅琊王氏大明七年人祔于土山謝濤之墓有古碑可考夫人之祖曰獻父曰靜之

冥漠君墓

宋書云元嘉七年彭城王義康修東府城城塹中得古塚爲之改葬使法曹參軍謝惠連爲祭文其畧云東府掘城北塹八丈餘得古塚上無封域不用甄甓銘志不存世代不可得而知也公命城者改埋東岡祭之以豚酒旣不知其名字遠近故假爲之號曰冥漠君云爾

齊明欽劉皇后墓

南史齊明欽劉皇后高帝爲明帝納之永明七年葬江乘縣張山今隸淳化鎮之北

齊獻武公墓

在栖霞寺側有碑額云齊故侍中尚書令丞相巴東獻公之墓

齊明僧紹墓

隸攝山栖霞寺前明隱君僧紹舊居攝山後葬此今去城四十五里

梁吳平忠侯墓

南史梁吳平忠侯蕭景字子照諡曰忠墓在花林之北有石麒麟二石柱一題云梁故侍中中撫將軍開府儀同三司吳平忠侯蕭公之神道今去城三十五

里

梁始興王墓

南史梁始興王蕭憺諡曰忠武墓在清風鄉黃城村有石麒麟四及神道碑云梁故侍中司徒驃騎將軍始興忠武之碑今去城三十七里

梁安成王墓

南史梁安成王蕭秀字彥達諡曰康墓在甘家巷有石麒麟二石柱一及神道碑二題云梁故散騎常侍司空安成康王之神道南史稱佐吏夏侯亶等表立碑誌王僧孺陸倕劉孝綽裴子野各製其文欲擇而

用之咸稱實錄遂四碑並建今所存者二其一已磨滅其一字畫猶可讀乃彭城劉孝綽文也去城三十里

梁臨川王墓

南史梁臨川王蕭宏字宣達諡曰靖惠墓在北城鄉右石柱碑二題云梁故史黃鉞侍中大將軍揚州牧臨川靖惠王之神道去城三十里

梁建安侯墓

南史梁建安侯蕭正立諡曰敏墓在淳化鎮西宋野石柱塘有石柱二題云梁故侍中左衛將軍建安敏

侯之神道去城三十五里

陳高祖陵

建康實錄陳高祖永定二年葬高安陵隸縣東南古彭城驛側今縣東崇禮鄉地名陵里有曰天子林其地有石麒麟二里俗相傳卽陳高祖墓也去城二十五里

陳文帝陵

建康實錄陳文帝天康元年葬永寧陵隸縣東北陵山之南今鴈門山之北

左伯桃墓

烈士傳曰左伯桃羊角哀燕人也二人爲友同時遊學聞楚王待士乃同入楚至梁山值雨雪糧少伯桃乃併糧與角哀令往事楚自入于空樹中餓死角哀至楚爲上大夫乃告楚王備禮葬左伯桃于此唐大曆六年魯公顏真卿經此以詩弔之書於莆塘在溧水縣南四十三里

雙女墓

雙女墳記曰有雞林人崔致遠者唐乾符中補溧水尉嘗憩于招賢館前岡有塚號曰雙女墳詢其事迹莫有知者因爲詩以吊之是夜感二女至稱謝曰兒本宣城郡開化縣馬陽鄉張氏二女少親筆硯長負才情不意爲父母匹于鹽商小豎以此憤恚而終天寶六年同葬于此宴語至曉而別在溧水縣南一百一十里

南唐張懿公墓

公名君詠字德之有神道碑題云大唐順天翊運功臣特進守太子太傅上柱國清河郡開國張懿公神道去府城十里在石頭城後

南唐李順公墓

公名金全字德鏐有神道碑題云唐故開府儀同三

司檢校太尉兼侍中贈中書令李順公神道在城西金陵鄉七里鋪

南唐高越墓

攝山棲霞寺舊門外北山之麓有石題云侍郎高府君墓去縣四十五里

碑刻門第十四

吳孫皓封禪碑在常州宜興縣封禪山磨崖而刻今尚存

吳天璽元年紀功三斷石碑皇象書

晉侍中右光祿大夫西平靖侯顏公太宗碑公名舍

字弘都今在府學顏真卿書

晉右光祿大夫西平靖侯顏府君碑真卿書今在府學

晉建威將軍思平縣侯竺使君銘在金陵鄉張陣湖
晉建威將軍思平縣侯竺使君頌在張陣湖碑石損斷

宋謝濤夫人王氏墓記在土山淨名寺後菜園中今移在上元縣

齊侍中尚書令巴東獻武公碑在黃城村梁普通三年造

梁侍中司徒驃騎將軍始興忠武王碑徐勉造貝義淵書在清風鄉黃城村

梁散騎常侍司空安成康王碑劉孝綽撰貝義淵書在清風鄉甘家巷

梁永陽昭王墓誌銘徐勉造在清風鄉居民井側今在上元縣

梁永陽敬太妃墓誌銘徐勉造在清風鄉路傍

梁臨川靖惠王神道在北城鄉

梁侍中吳平忠侯蕭公神道在清風鄉花林村

梁建安敏侯神道在鳳城鄉淳化鎮西

梁上清真人許長史舊館壇碑丹陽陶弘景撰并書

梁普通三年五月五日記唐紫陽觀主劉行矩等重

勒在句容玉晨觀

陳江揔棲霞寺碑在攝山

陳官井欄題刻在法寶寺之西邦人云字漫滅惟戒

哉二字可辨今不知其所

平陳碑隋薛道衡撰文虞世南書在石頭城西

大唐高宗明徵君碑在攝山棲霞寺高宗謨高正臣

書

大唐棲霞寺齊會記大和五年立

大唐棲霞寺律大師碑大曆四年立

大唐重建開善寺記在蔣山寺

大唐玉清觀四等碑開元十五年立陶巨莊書碑石
損斷今置崇禮鄉玉清觀墓上

大唐沈傳師齋疏徐鉉題名在棲霞寺千佛嶺

大唐王法主碑鳳閣侍郎同鳳閣鸞臺三品弘文館
學士劉禕之文唐文明元年立在茅山崇玄觀

大唐紫陽觀碑太子右諭德徐鉉文尚書

楊元鼎書并篆額在茅山玉晨觀

大唐玄靖先生李含光碑湖州刺史魯郡公顏真卿

文并書在玉晨觀

大唐遙傷茅山孫尊師詩碑唐司空兼門下侍郎平
章事李德裕述前知鹽鐵轉運使上柱國裴質方書
在玉晨觀

大唐三洞景昭大法師韋君碑檢校國子司業吳縣
開國男陸長源文檢校尚書兵部郎中兼侍御史竇
泉書并篆額唐貞元三年立在玉晨觀

大唐下泊宮記觀察判官監察御史裏行王師簡文
弘文館校書郎段令緯篆額在玉晨觀

大唐許真人并銘徐鉉文并書在玉晨觀

大唐祠宇宮白鶴廟記大曆十三年三月立尚書水部員外郎河東柳識文華陽崖舍退士中山劉鳴素書在鴻禧院

大唐義女碑李白文在溧陽縣潁陽江北

僞吳興化院銅鐘鑄文徐溫鑄在丹陽鄉香林寺

僞吳釘石鑄文順義元年鑄在靖安鎮

南唐方山寶華宮碑在方山崇真觀

南唐洞元觀請鍾記在崇真觀

南唐寶華宮功德什物在崇真觀

南唐李順公神道碑高越書在石頭城北

南唐張懿公神道碑朱銑書在石頭城後

南唐蔣莊武帝廟碑徐鉉撰朱銑書圖經云已亡今

碑石在蔣廟門外此圖經之誤也

南唐夫人易氏墓誌額在土山淨名寺

南唐李後主祭悟空禪師文并親書德慶堂三字在

清涼寺

南唐開善寺井記在蔣山寺

南唐義井欄刻字在石頭城後七里鋪

南唐僧用虛題棲霞寺詩在本寺千佛嶺

景德棲霞寺殿記在本寺高陟撰

景祐重造蔣廟碑陵陽景撰今置蔣廟庭下
惠烈廟記在蔣廟曹熙立

蔣廟篆祭文蔣堂文部必篆今在廟中
道光泉記王安國撰在蔣山寺

八功德水記梅摯撰在蔣山悟真庵後

蔣山太平興國寺莊田記僧贊元立

蕭帝寺記元絳撰在法光寺今名鹿苑寺
子隱堂記梅摯撰在法光寺

白雲菴記王安國撰在棲霞寺

寶禪師語錄序米芾書在惟政鄉半山寺

溧陽長潘元卓校官碑今在溧水縣漢碑附此

六朝事迹編類卷之下終

高陽許嵩作建康實錄又多汗漫參攷者疲於省闕
新安張養正哀舊史而爲六朝事迹編類部居粲然
俾江左三百餘年之故實名布方策非博雅好古未
易成此書也余叨守建康養正適以議郎居幕府因
取其書刊於此邦養正名敦頤屢專侯類以文章道
養正學者之所矜式此特餘事爾紹興庚辰立冬日
東魯韓仲通書

本草綱目

卷之二



國家圖書館, NATIONAL CENTRAL LIBRARY, TAIWAN, R.O.C.